

味檗齋文集

九



味 檠 齋 文 集

(九)

趙 南 星 著

味槩齋文集卷九

傳

明侍讀學士復菴吳公傳

吳公名中行。字子道。別號復菴。其先宜興人也。寓菴公始徙武進。寓菴公名性。登嘉靖乙未進士。歷官尙寶司成。生四子。長可行。登嘉靖癸丑進士。官翰林院簡討。吳公仲也。尙寶公筮仕爲南陽學博。生公於南陽。母曰段安人。公生而英偉不羣。兒時水嬉溺。履石以免。若有護之者。十九爲諸生。二十二而舉於鄉。是爲嘉靖辛酉。明年當計偕。尙寶公曰。孺子未可官也。勿往。又明年癸亥。尙寶公卽世。簡討公在京邸。公得親永訣。主喪。免終天之恨。戊辰上春。官爲修郟於簡討公者所摘棄。己巳入南太學。司成鳳阿姜公甚器重之。辛未升第。選爲庶吉士。癸酉授編修。念段安人春秋高。請告歸。三年以母命入都。時上冲年。委政江陵。橫甚。見公至。謬厚欲收之。會其父死。姻權不欲歸。同官知其意。卽以奪情之例請。而一時諸公卿臺省。皆上疏保留。得旨。公發憤上疏。言元輔張居正。以父喪求歸。陛下眷留不聽。欲以爲國家三年之喪。萬古之綱常所係。元輔身自違之。冒不韙之疑。陛下尙欲其敷化施政。端軌移風於海宇之間。必不能矣。國家

令典。丁憂守制二十七月爲滿。雖卑官小胥。匪喪有律。惟武弁乃墨衰從事耳。而可以處輔弼之臣乎。疏上。江陵大怒。明日簡討趙汝師之疏上。又明日比部艾純卿。沈純甫之疏又上。江陵益大怒。遂擬旨公與汝師皆杖二比部杖而戍。公聞報。南面拜段安人者再。曰兒死矣。有子事吾母也。相向拜毛孺人者再。曰知子能事母撫孤。吾長逝無所恨。遂躍馬出。而逮者以銀鐙至。公呼子亮曰。取酒來。酒盡一卮而入朝。時天晴。陰雲倏起。雷隆隆動城闕。杖畢。口鼻耳略血。昇而出。幾絕矣。秦中書餘山挾醫來。投藥一丸。始蘇。是日進士鄒爾瞻之疏上。又擬旨杖戍。金吾進公等出。抵張家灣。數日而段安人之諱至。公嘔血數升。復蘇。時潞水冰不可舟。乃陸奔抵家。廬墓者三年。時吏於土者。揣江陵之意。多欲殺公等以求美官。如安成劉御史臺之事。賓客皆避去。而吳氏者至。與汝師絕婚。居五年。而江陵乃死。諸言事者皆起。公嘗宮允。明年至右諭德。會丁御史此呂論科場事。謂自張居正之諸子。皆以不學。蟬聯升第。其後衡文者。率以賢科爲阿尊市寵之具。斯亦濫矣。而中允高啟愚主試南京。以舜亦以命禹爲題。無人臣禮。可斬也。疏上。冢宰自草疏參丁御史。以言語文字害人。而王給事士性。江御史東之諸人。皆參冢宰。閣部佯求去。諸公卿合辭留之。公乃上正朝廷疏。曰。保留大臣。乃故相之遺事。諂諛之極。甚可恥也。參言官以媚輔臣。此壅蔽之漸。不可長也。疏上。嚴旨切責。丁竟左遷。公稱病求去。不獲復出。迨經筵進講。直言大臣阿意順旨。及邊吏掩敗爲功。於是執政大恨。邪黨乘而爽之。公遂乞休。執政擬旨許之。時太倉以予告。亦在里中。要公就之。晤

語。公謝弗敢。久之。太倉秉政。公以侍讀學士起家南京掌院。公固無意出。而言者又譽之。以成其志。公竟卒於家疾。力歌四閔。正襟長逝。公天性孝友。事簡討。公終身不敢與鴈行。其好善惡惡。皆甚。無所回隱。平居於國家之典故。中國四夷之利病。無不研考而熟計之。汔平治天下。而矧於讒慝。不得施。然其正氣。矯節。與日月爭光矣。

趙子曰。江陵天資慘刻。其氣力足以鉗持天下。雖萬里外無不廩廩奉約束。而吳公首撻之。遂以其父之死立懂。吳公謂予曰。方杖時。江陵使監奴守視。欲斃之。其惡如此。自是在位者。皆狙其睚眦。爲之殺人。幾若冒頓之射。非天去之疾。吾不知烏之所止也。今之人見天下法紀陵夷。多稱江陵忠有才。夫自古未有不孝而忠者。弑父之子。弑君之臣。孰爲無才乎者。江陵死而繼之者。若鳩之與剪。性有緩急。其毒一也。太倉尤甚。吳公受命於貞節。不可化。故中沮。艾先生余師也。四公者皆嘗與余同朝。癸巳。趙汝師爲少宰矣。觀其意欲抑默侯時。而吳氏一乳臭子。上疏詆譭。立逐之去。乃知吳公之不可及也。吳公子亮爲御史。數干言時政。以羣小不能容。掛冠歸。

李太公傳

李太公者。名棟。字良材。別號湖西。父繼古。以子司馬化龍巡撫遼東時。剿虜功。封兵部右侍郎。兼右僉都御史。贈父官如之。李氏世爲長垣富家。太公之祖誠。入贅游太學。爲盱眙丞。盱眙丞五子。繼古其季也。貌

僕僕甚偉。有才幹。父悉以家事委之。然性醜酒。竟病。年三十卒。而李節婦之名顯。朝廷旌之。李節婦者。太公之母。張後贈淑人者也。父歿時。太公七歲。張淑人憐之。及長。乃令學書於外父吳太學。曰。俾能識丁。可督家。然太公乃勤學日進。而諸父皆無任。家產日蹙。乃析居。大公得田二百畝。宅一區。徒四壁立。張淑人泣。太公曰。兒卽不肖。何至以田二頃。不能爲宅。母無憂也。乃罷學書。而亟爲宅以居。以力田所入。益充拓之。宅乃勝於諸父。太公才幹如其父。而貞節之所陶染。艱難之所淬灑。矧矧愼畏。自幼寡嬉笑。親賓羣飲。有李太公卽四筵雅靜。待人和遜。專掩護人之過。行誼重於閭里。司馬兄弟童時。司馬以奇稱。張淑人乃與兩孫移城中。就師授經。太公留田間。作勞以供之。每數日來省母。及問兩孺子之業。輒自視具肴核醕酒。自滿飲勸母。酒中則述母平生勞苦狀。我旣無所成。孺子不自勉。當誰報爾祖母罔極之德者乎。則泣下。張淑人司馬兄弟皆泣。每輒罷酒。以是司馬兄弟皆奮學。張淑人猶見司馬成進士。表揚其節。受祿養者數年。司馬初試宰嵩縣。迎太公。再三乃往。至則精問治邑狀。知司馬能其邑。居一月歸。司馬留之。曰。欲耕耳。留恐荒吾田。太公在家。殊亦不閒。遠邇人皆知李太公仁心。好恤人之急。親族之貧無居者。饑者寒者。壯而不能室者。歿而無以爲葬者。孤露者。欲得母錢。舉責者。欲裨販者。皆來餽問。太公無不出見之。皆得所欲去。司馬官益大。所得奉錢益多。則所待生活亦益多。所給益厚。其所自奉乃甚約。不好奢麗。每受封。則服其冠服。北嚮望闕叩頭已。受兒女羅拜。卽藏之。曰。以明聖恩耳。出門惟引一僕步行。幅巾漣衣。乃

不類富家翁。見人無親疏貴賤。皆與平揖。款款源譔也。里中皆言李太公官大。能自挹損。太公聞之笑曰。吾未嘗爲大官。亦未嘗挹損。張淑人之歿也。太公哀毀甚。治喪皆如禮。然用浮屠法。曰吾母素好佛也。司馬二十游宦。久未得歸。時時念太公。欲移病自免。太公不許。至遼東立功後乃歸。司馬兄弟始皆有子。太公殊喜。又司馬在家。日與崔太公與蒼舊。逐麗景。眷嘉序。敷筵設几。以司馬兄弟侍酒。樂可知也。居一年而播州楊會反。朝廷起司馬徂征。司馬發家時。賊已破黔軍。屠飛練。入境則綦江破。殘二將軍。聲勢震天下。叟兵不支。司馬方徵兵爲取賊計。而其兄雲龍卒於家。無何而其配王淑人卒於蜀。參佐歿者二人。司馬念身爲獨子。父母老。何心討賊。草疏欲求給養。太公業有書止之。然司馬固不得弛擔。而訛言羣飛。或謂李太公家被大盜。或謂王淑人卒。繇閣中相殘。其言不可忍聞。不知其起自賊中耶。或非賊中耶。要之欲亂其心。俾無成功。而又張賊之勢。若其工蚩尤。難可與交鋒。太公不能無疑懼。遂病嘔血。彌留。家人姑爲好語寬之。曰賊滅矣。曰信乎。曰信。忽起北嚮額手呼萬歲者三。復臥遂絕。太公自七歲。張淑人於孤苦涕淚之中。煦育之以有司馬兄弟。其慈之異於恆情。然以司馬弱冠受國恩。又贈及父。及張淑人。稍酬苦節。居恆以爲何能報萬一。故司馬欲病免不許決。至播州之役。尤非其情。而割以大義。竟以憂歿。太公歿後兩月而賊滅。司馬上疏求終制。朝廷許之。而難其代者。司馬病幾殆。年餘乃歸。

趙子曰。余讀詩至陟岵。未嘗不傷心也。孝子行役而父念之。祝之曰。猶來無止。母曰。猶來無棄。兄曰。猶來

無死兄之言。蓋言其父母之所不忍言也。則痛之至也。蓋行役之久且如此。況於虎狼方咆哮而遠入其窟。父母何得不憂。又日聞不祥之言。李太公將七十老人。日迫崦嵫。而烈風送之。其能緩須臾乎。余覽友人孫文融所述李太公事。痛深於陟岵也。然李太公父子忠孝之節。盛矣哉。

韓太公傳

人之生皆尊其生。慈其身。莫不欲富。竊人思顧石之儲。生可理則思百金之產。百金思千金。千金思萬金。有萬金則其欲益軼而無厭。然其人有異。亦係習俗。或好自奉極奢。或愈富愈嗇。數米而食爲餓。不得已。雖兄弟親戚不相顧。以爲不如是則不富。有一人焉。食取充虛。衣取掩形。曰。吾無所用富。則天下之人。皆以爲君子矣。然周公聖人也而富。子貢范蠡賢人也而富。豈足貶其聲名哉。南亭有韓太公者。名珂。字廷器。其先山西長子縣人。永樂初以往者靖難之師。三過南亭。荆棘宅之。徙山西富室。實南亭。太公之祖士辛以中徙至。而生林。林生景聰。配孫恭人。生求忠。韓故攜高營來。至太公益拓而大之。軒豁慷慨。立然諾。好成人之美。緩急叩門者。未嘗有難色。視爲己事。其所覆寒食餼。助娶救喪甚衆。有木客貸金九十。逋累年。自度不能償。則飾其女孫。具肴核。邀太公曰。負債無可償。願以弱息供掃除之役。太公蹙然而出曰。何至是。卽折券付之。又有逋數十金者。扶服詣門曰。貧甚無能償。願矢之來世耳。太公卽焚券。仍留之飲食。乃去。嘉靖癸丑庚申歲皆大凶。悉發藏粟賑施。僦路氏園設粥。活千人。四方青衿來者。禮食之尤厚。歸者

皆有所贈遺。每見棄嬰孩者，卽取歸以付孫恭人。恭人皆勤斯煦育，無子女欲取者，卽與之。所長成不可勝計。太公之粥簞人，蓋起於十月。越明年二月，謂東作漸興，若曹宜散而食力乎。衆曰：「賴太公不填溝壑，然出未必卽得食，奈何？」太公曰：「吾亦慮之。」乃各廩之餼糧及錢，衆皆泣拜而去。里中有周文學家貧，太公延之爲塾師，會淫霖，度其必大窘，乃遣僕遺之米。周大喜曰：「吾瓶粟盡者一日矣。」第無薪，將縮屋而炊耳。亡何而載薪至。周爲之長漕曰：「父母生我，未必念之。周至如此。」太公二子諸孫皆相繼爲青衿，而其孫參政君以考最，贈祖父如其官。孫爲恭人里之縉紳，父老子弟皆曰：「韓太公多陰鷲，固知其子孫必興。今果然矣。」參政君七歲能誦書，太公異愛之，曰：「吾老矣，不能見汝成立。」參政君曰：「異日當徼國恩以報大父恩。」竟如所言。太公猶及見參政君爲青衿，甫十二耳。太公旣貴盛，桃父之惑，昧爽不忘。每見人之狎妓者，暴殄天物者，及居官貪婪者，深恨之，輒舉以戒子孫。參政君兢兢守之，以有令望於時。

趙子曰：「吾聞之孔子，惜其腐餽，而欲以務施者，仁人之偶也。不富安所得腐餽？仁人好濟物，其欲富甚於恆庶。故子路願裘馬以共朋友，太史公羞原憲季次，豈可謂無見乎？韓太公可謂仁人矣。夫富之所濟有限，若乘貴勢以行之，其陰鷲可勝道哉？」韓太公旣以富行其德，參政君所至皆膏沃士民，其德可歌。今且耆力疆方，著安攘之烈，韓氏之興，其川至而日升矣。參政君名策，與余甚厚善。

晉府典膳孫公傳

自生人之初。以迄於今。風氣日漓。習俗日敝。若趨而每下。不知當作何狀。然而天地淳龐之氣。時聚時散。一代之中。百數十年之內。自爲古今。卽其散時。亦必有所鍾。故其人能存先民之遺意。而風俗賴之多寡。係乎其時。以今日而視成宏間。愈弗能及矣。獲鹿觀察孫公。篤行古君子也。爲余言其大父典膳公之爲人。余慨焉慕之。孫氏世縣獲鹿。國初有以人才徵者。畏法網嚴。殘一目以免。不知其名。而名賢者以邑掾爲卽墨主簿。生璨。爲諸生食廩。不得舉。則盡斥賣其產。入貲遊成均。仕爲紹興府照磨。娶聶生謙。是爲典膳公。典膳公樸茂厚重。有辦護才。孫故家於城南之永壁鄉。照磨公未仕時。乃結茅屋二楹於邑城之西門。典膳公與其配蕭媼所拮据而成也。門前爲木市。管之木客往來。主於典膳公館粲之。典膳公誠信不欺。愛人而有禮。木客見之。如親戚累舊。久之有田數十畝。在西山下。每躬耕其中。蕭媼汲水於城南。往來里許。炊熟復往饁之。未嘗告勞。照磨公旣仕。典膳公從之。三年而歸。久居浩穰芬華之地。質素不渝。布袍麻屨。糲食藜羹。一切如往時。稍有贏餘。每用之以振急恤憊。買田宅必厚其直。照磨公在任凡八載。無內顧憂。典膳公自以不讀書。乃令其二子皆讀書。無遠近。爲延名師。不惜束脩費。長曰光祖。從同邑楊孝廉睿學。易及守遼州。猶負笈隨之。是爲觀察之父。後爲沂水令。贈廬江郡丞者也。次曰榮祖。從姚江黃孝廉釜學。禮與井陘武中丞金同師。後爲無爲州訓導。公在紹興時。照磨公爲入貲。遙授管府典膳。故稱典膳公。照磨公治家極嚴。典膳公恪守之。子之侍父。弟之恭兄。婦之奉姑。懷懷若朝典焉。每日大小皆早起。其

春汲皆沾霜露。屹屹至夜而後即安。自少至老。自貧約至富盛。如一日。茲豈非天地涓龐之氣所獨鍾。存先民之遺意。而風俗賴之者乎。夫涓龐乃能勞。勞則儉。儉則生禮義。有禮義則可以昌後。故曰君子能勞。後世有繼。春秋之世不古矣。翼缺世家也。而夫耕婦馱於野。此風邈焉絕矣。於典膳公見之。今之士大夫。率以奢僭相競。長安之市。無鳴珂焉。處大屋。盛僕從。治服珍食。夜中醉而日中寢。小民效之。禮義日以消亡。安得有如典膳公其人者哉。蕭姬每向觀察言。照磨公在紹興時。百姓稱青天。而太守公稱明鏡。聲譽出其上。又言吾嘗隨之紹興。見漕河萬艘北來。歷黃河呂梁洪之絕險。高寶諸湖揚子錢塘江。皆天下巨浸。又金山寺屹然江中。望之殆非人境。儒子能至其地乎。其賢達如此。照磨之爲官甚卑。典膳公老田間。其立身居職處家之道。皆可以爲法。觀察宦業彪炳。行誼醕備。子孫日貴顯而不驕。豈偶然哉。夫託胥遺榮以得其身。此北風詩人之明哲也。固足以稱於後世矣。而其名不著。殆自霾而銷其聲者耶。幽介之人。湮滅若此。當不少惜哉。惜哉。故余述典膳公事以傳。

紹庭王公傳

王公名三遷。守養蒙。別號紹庭。濟南府之臨邑人也。勝國時有名盛者。爲十道馬步督大將軍。明興。自萊陽徙臨邑。三傳而爲陝西岷州衛經歷輔。輔生倫。倫生處士公。世禮。時大盜齊彥名等衡行。所至人皆逃散。過臨邑。處士公母老病。獨侍母不動。賊大奇之。謂處士孝子。吾不忍犯也。去。仍留一大箭。禁後來者。處

士生貨。娶劉太儒人爲諸生食廩矣。早世。劉太儒人二十四耳。時王公在妊也。劉太儒人矢死以徇。而處士公夫婦涕泣。謂婦念我兩老人。天其或者以婦不泯王氏之祀。未可知也。劉太儒人乃不死。閱四十日而生王公。王公晬時。示之諸物。惟手掇孝經抱之。甫能言。劉太儒人口授四言詩。輒能成誦。處士公大喜。乃名之曰三遷。蓋以孟子之母比太儒人云。及就塾從師。日端領而肄習。諸童子羣嬉其傍。弗視也。或黷之。終不肯從。每歸。太儒人問其業。有所扞格不敢隱。太儒人怒讓。或笞之。鄰母謂太儒人寡居。撫此弱孤。何忍過督責爲事解。公間謂鄰母意良厚。但勿言孤寡。傷吾母心。鄰母泣下。謝不敏。王公發憤務學。從大儒李先生。盡得其道。尋爲諸生。名隱隱起。公喜易。從外舅于公受易。大有所悟。著連山挾要。雙草截蒲錄。齊魯之士。皆自以不及也。其事太儒人。供養致洗腆。有不安節。則日夕侍藥艾。謝絕諸賓客。平愈乃已。太儒人閒居。公時採井里所習傳忠孝義烈事。陳說於前。其仇離永隔者。詭曰。竟獲完好。其伏節死者。曰有神人活之。皆成吉祥善事。太儒人爲之色喜。所有一錢以上。皆屬之太儒人。其所出入。無有不稟命者。所欲振貸。無有不欣然奉行者。公娶于恭人。生觀察君與吏部君。皆少。恭人先太儒人卒。太儒人猶及見觀察君食廩。七十有一而卒。王公幾成死孝。旣祥。焚楮以祭。火隨風起。公抱柩號哭。風折而南。火遂息。及葬。囊篋無所有。乃鬻田襄事。質飾俱盡。竭罄心力。長潛哀號。塗人酸楚。越三日而甘露降於庭。柏邑令劉君欲上聞。公力止之。令乃以節孝奇徵表其閭。及二君同舉於鄉。公俯而垂涕曰。吾母苦節四十餘年。而不

能以五年待兒輩之成名也。觀察君先成進士，授戶部主事，乃上疏陳太孺人守節存孤狀，有詔暨坊旌表。而太孺人之節聞於天下，王公以觀察公貴，地封至中憲大夫，論者以爲行道之福。吏部君成進士，爲東光任邱令，而王公卒，公素康彊，會諸生李君慎母卒，李母故與太孺人同以節舉者，公往會葬，思太孺人不勝悲也。一疾遂殆，觀察君名浩，吏部君名洽。

趙子曰：昔人謂執一術而百善至，百邪去者，其惟孝也。王公天稟至性，又成幼而見母氏之伶俜，單子劬勞，悲苦萬狀也。以忍爲慈，而督教之，以望其成也。塵俗之情都盡，而一意於南陔之養，白華之潔，加之隆師好學，博精學易，要皆本之孝思。海內操觚之士，稱述王公者，多盛德高義事。余第紀其孝行之大者，余門人周長卿爲臨邑令，所聞王公事甚詳，實爲余道之。是時吏部公休沐居里中，其奉繼母極孝，蓋齊魯之間，稱節孝者，首王氏，而文學之美，幾爲所掩矣。

鄒先生傳

鄒先生者，其先麻城人也。紅巾之亂，雲夢殘，徙麻城，實之名文斌者。以中徙與焉。文斌生盡善，盡善生顯，顯生伯潛，伯潛生鵬。鄒有隱行，顯尤好施，以故家日貧。鵬生夢龍，楚稱鄒先生云。鄒先生弱冠爲諸生，困甚，好學不輟，於典籍無所不窺，而歸於明道德經濟，欲維天下之紀，不爲俗學。諸生伏膺受學者甚衆，多所成就，與人言，無貴賤愚良，皆以道義誘勸之。朋友必相切直，或至不可堪，然著於至誠，故能見信。雖不

善之人。被其嚴拒。終亦無怨。每讀史至忠義善事。輒欣然慕之。安得爲之執鞭。其頑譏邪惡。傷國翳上者。則髮植色怒。若見其人。又爲之論讚歌詠。以識不忘。先生之學自慎獨始。嘗曰。吾每萌一私念。輒深刻責。若緒爲之不夷者累日。以是後念漸落。嘗有菅屨厭冠而泣者。曰。家遠親喪。不能歸也。先生釀金贖之。久之詐覺。或以爲譏。先生曰。嘻。彼以所不忍欺。而吾以所不忍疑。疑乎。甫見之。則皇乎哉。聞者嘆服。先生初以易教授。既而喜禮。令諸子皆學禮。曰。夫神欲虛。行欲實。探虛者於易。踐實者於禮。取宋朱氏所輯家禮。斟酌行之。至喪祭尤兢兢焉。惻惻憚詭情物相副。每言宗子之法。未易復也。欲置田贍族人之貧者。而力不能。喟曰。天乎。不使吾得志何哉。鄒先生竟困於科舉。老諸生間。病革。夢一儒者。自稱仲繇。贈之以言。若曰。先生亦仲繇也者。覺而書邵雍程頤二詩而瞑。先是有勸先生入講學會者。先生弗願也。曰。夫學豈口耳哉。亦在乎篤志力行耳。書趙清獻畫之所爲。夜必告天之語。以自勸。是時講學者多尙超悟。以宋儒爲迂。而察其所爲。往往越禮傷教。故足羞也。假令講學者咸若孟秋之倫。先生方尙友。豈所覲而忽諸。鄒先生可謂闢然日章矣。先生有子曰觀光。爲吏部郎。以文章節行聞於世。

陳貞父傳

陳貞父者。名以忠。吳之無錫人也。其先世縣嘉定。有名景佑者。始徙無錫。景佑與僧道衍遊。及衍佑文皇帝靖難。遂匿不見。景佑生昱。令永康及同安。皆有惠政。二縣紀之。昱生周官。爲河南參政。風節甚高。王府

有侵民田者。參政輒予民。王怒。暮召參政便殿。閉拒。詰朝乃見。曰。參政若風霜耶。周官正色曰。參政故不畏死。王不能詘。罷之。行部有掘得金若干者。以獻。以償民之逋賦者。河南有卻金亭。民爲周官所立也。周官生鳳。是爲貞父。父以貞父贈甯鄉令。有隱行。工詞翰。貞父生而十歲能文詞。聲稱在諸生間。籍甚。然數試於有司。不得舉。則遂棄文詞不事。潛讀孫吳諸子所爲書。習騎射。力能挽一石弓。已而父知之。以時方賤武。不欲令之復修儒業。然恥同時俗好六朝以上人語。其學無所不該。以是知之者鮮。貞父雖衣冠諸生。然豪俠有權術。其志宏遠不可測。父多病。不事家人作業。從人勾貸至二千金。卒之後。貞父勾貸無應者。又經島夷之亂。居室盡焚。貞父痛母之無養。躬作苦。輔之以術。盡償父債。家更殷富。喜恤人之患。海內賢豪長者多慕用焉。貞父數困有司。不能鬱鬱家居。乃入貲爲太學生。藉以游燕趙間。冀或有識者。而太學生山東王君榮以應鄉舉。或誣以姦事。當適戍。貞父知其冤。力請大司成。按之公卿間。得虧除爲士伍。君榮竟奏辨。爲諸生復得舉。貞父之力也。以是燕趙間皆俠貞父云。貞父爲人魁梧精健。有奇氣。談論英辨。筆札甚敏。如其舌。得者寶之。左相袁公煒有門下士張翊者。求貞父爲啟。邀袁公飲。袁公睹其啟佳甚。稱之。翊謝不能。實友人陳君所爲。袁公遂因翊交於貞父。袁故輕士。獨見貞父甚敬重焉。是秋貞父復不得舉。明年乃南歸。爲園曰鳴玉。與詩人王叔承唱和其中。丁卯復當試士。諸故人爭勸貞父就試。貞父自見數奇。不欲往。不得已復往。乃始得舉。然又不得成進士。久之乃謁選爲甯鄉令。於吏事迎刃立斷。法之

所非。卽上官所欲爲。力挂之。而剛辨毅博。足伸其志。上官往往詘焉。至其廬。念民瘼。則又慮及細微。靡不關衆便者。故士民至今思之。移遷甯州。州多山。囊盜千餘人。又無城。貞父至。輒城之。察知魁宿尙崇等數十人。下教招之不至。而盜多中訶。不敢聞諸上官。第密聞觀察王公。總戎戴素亮。練兵甯州。貞父知其才可用。授以計策。遂焚賊巢。斬獲甚多。尙崇等二十四人跳。捷聞。御史疑未先白。何遽能鏖賊如此。乃二十四人者。復爲游徼所識。相與鬪傷。於是道路訛言。賊如干犯甯州。御史益疑前報捷詐也。遂劾貞父。左遷寶雞令。時大旱。貞父再禱諸雞山。皆雨。又邑民張崇禮者爲祟。死者五十餘人。貞父爲書城隍。約以三日滅崇。不者且廢神祀。越三日果滅。民以爲神。未幾。稍遷光州。楊朝欽及子陞。州之大賊也。能爲飛語撼長吏。長吏憚之。固始令邵甄疏之。貞父捕朝欽。陞按治如疏。朝欽竟遣戍。陞爲城旦。州人快之。其所在必求得其豪射之。以明不畏。類如此。貞父久在郡邑。名素著。汝南多訟。一切疑獄。他州邑累年不能考立者。上官皆以屬之貞父。或復以文請。是時貞父年六十餘。稍衰矣。故日病。移書當道求去。凡五上不允。遂棄璽去。抵家。無何卒。貞父材術甚高。困於郡邑。甯州之役。稍見其奇。所至皆著於民。思其規撫。自非他吏所能及。然貞父出緒餘爲之耳。其地自有紀。茲著其大致云。

趙子曰。余爲汝南理時。則陳貞父爲光州。貞父後余至。見其人倣儻有異。符所聞。蓋俠士。然俠者多無術。有術或用之離於正。貞父兼之。倘遭會行志。其業當未可量。坎壈郡邑之中。僅以良吏顯。豈不惜哉。士貴

得志於當年。若貞父者足不朽。彼豈區區爲名高而已乎。孰惡孰美。成者居首。不成者居尾。世不復有貞父。誰可與道此者乎。

李節婦傳

夫求鳳於采。失之練珂。故士察實不留聲。乃若魏李化龍于田知名海內。豈虛哉。始于田成進士。財弱冠。爲嵩縣令。縣極治。能父母其民。民忘其少。厥時邪宰擅世。慮名士叛己。歸誠乃用之。所壞人甚多。于田令六年不見徵。余甚怪之。于田少年才與節表表。乃如是。殆夫天奇之哉。無何而學使者新安羅公以李節婦事聞闕下。表厥宅里。李節婦者。姓張氏。則于田之祖母也。余乃知于田非夫天奇之者也。其祖母則甚賢母也。于田之祖曰李處士繼古。李故厚產。處士公少而克家。有質行不苟。士大夫重之。節婦歸八年。而處士公卒。卒之日。于田父封工部公棟甫五歲。女一三歲。時值事充政重。年數荒。困篋空虛。索賦者日譁於門。節婦撒環璫以給。躬捽茹春覈。拮据作勞者十數年。子冠復克家。女嫁爲同縣殷煉婦。煉舉於鄉。李氏寢盛。迫于田與其兄雲龍舞象。于田角犀穎異。以奇稱。節婦乃令兩孫從殷生受學。每鷄鳴起紡績。則呼兩孫起讀書。三年。兩孫皆補諸生。于田遂舉進士。致通顯。于田之之嵩縣也。節婦與俱。聞譁。腮聲則色不喜。以是于田尙寬。退食輒告祖母。今日所虧除人罪幾。具言主名事情。則大喜。宜如是。蓋節婦好佛。積慈篤敬鬼神。其天性然也。繇斯以談。于田之名蚤而位日高。豈不宜哉。李氏之家于蒲。其先所可知者十

餘世矣。以貢雄不儒。處士公之歿也。人皆以李氏衰矣。卽節婦以單子膝五歲兒。倘無遘疾長成。從牛後至足。敢言他哉。是以不敢令于田父儒。而于田竟儒。儒又爲于田非小儒。方節婦撒環瑱給吏卒時。詎知有今日哉。是以于田自南驗封郎。考績過家。省節婦而旌表之。詔鼎至蒲。男女聚觀之。無不驚喜歎羨。節婦低而泣也。溺則笑。活乃悲耳。他人安能知之。嗟乎。天之所以艾節婦者亦厚矣。大哉節乎。靈淑鍾焉。吉祥興焉。光烈洪焉。則李氏以爲徵矣。作李節婦傳。

姚節婦傳

吳中姚孟長。與余聞聲相慕用久矣。以是知其母所謂姚節婦者也。余林下多年。孟長抱奇久不售。相去遠。己未成進士。選爲庶吉士。余乃與相通。孟長述母氏之嫺節示余。余讀之未竟。而再三歎也。蓋今天下人皆知孟長之高才博學。能文章。而不知其節行。以今天下人尤輕節行。故夫義明而後節立。伯夷殷之諸侯也。陳仲子齊之世大夫也。皆不顧其死。以全節。非苟爲譎觚而已。義可死則死。與可生則生。一也可貧賤則貧賤。與可富貴則富貴。一也。末世之士人。率以禮義廉恥爲累害。惟富貴之知。其求之靡所不可爲也。弗得爲幸。得之則愁矣。有進而無卻。其固之靡所不可爲也。戮辱笑罵弗顧也。誣誣焉。以至於老死而後已。人人皆然。國家安得不危。危而望斯人以盡臣節乎。可不歎哉。姚節婦者。文姓衛輝公元發之女也。十五歸姚公。克敬克順。事姚公母殷。生母施。咸歡從。姚公南太學而生孟長。還而姚公卒。節婦年二十

二孟長生十月耳。一哭斷絕而僵。兩母扶抱叫呼之。移時乃蘇。蓋節婦與姚公同病殯殮。喘息僅屬。易死也。而爲存孤不死。每乳孟長已。卽被衰麻。臥之苦塊。如成人執喪之禮。弔者見之。往往長潛。失聲而去。此時衛輝公方令浦陽。應門無人。姚公之伯兄欲與十月之姪共征徭。訟之縣。使五伯縛兩廬兒去。責令其主母赴訊。時節婦方大病。施孺人抱孟長入縣朝。哭而過市。無不靈傷者。適袁安節奉常休沐還。聞之。爲言於令。乃解。蓋奉常乃孟長大父武陟公門人也。及衛輝公還笏歸。而節婦有所依恃。無患矣。節婦生而明禮義。洞曉事情。讀三禮小學內則諸書。悉能通悟。衛輝公有疑事。數與商榷。殷孺人先卒。節婦事施孺人二十餘年。姑猶母而婦猶女也。殷孺人疾革。泄下無時。節婦自搗滌其衣器。無難色。孟長六歲而能讀書。十六而爲諸生。抗志矯修。致身豪傑之林。與舅氏文文起。以文章節行相砥礪。視世之倖貴苟祿者。猶蠃鼠也。君子謂節婦能教。蓋自十月喪父。臥之苦塊。卽教之矣。孟長以痛心爲學。故其學苦。生長於貞潔之中。故其行芳。見母氏之孝之慈。非他人之孝慈比也。故其愛不啻深。三十八而成進士。在孟長爲甚遲。非以一官爲華。第欲以慰親心。報罔極耳。先是薛侍御貞按吳中。上節婦之事於朝。旌其門。孟長復翔於天塗。姚母之節。海內莫不聞。余於是而益知節之貴也。文氏吳之名家。累世皆偉人。而文待詔之名。人士能聞雷霆者。舉知之。節婦其曾孫也。濡於詩禮之訓。而染於白華之行。少成若性。非惟有所慕效。自待不能薄而已。豈若單門細族之崛起者哉。然益見其爲名家矣。譬之松柏。歷霜雪而彌秀。其在於小山。則若

增而高。其在於大山。則若益增而高。非有之而自若也。甚哉節之貴也。孟長陟龍鳳之署。何官不可至。母自此常爲夫人淑人。然不若稱節婦之貴也。何者。世之夫人淑人無數。而節婦甚少。節者。根於性而成於志者也。古今之所甚難也。故詩人有凱風之歎。令伯有報劉之悲。此其人皆賢者。而不免於怨。如之何其不貴節也。其在於今尤貴。孟長行將以母氏之節風天下。而挽回其飢寒鮮恥之習。以匡世道而扶國步。庶可以慰母氏。成不匱哉。孟長曰。希孟八世祖母黃孀居二十八年。值高皇帝澄清畿甸之始。首膺恩命。旌其門。亦稱姚節婦云。

陳貞婦傳

昔孔子贊易至於咸。殷懃深述其義。以爲夫婦之道。參配乾坤。父子君臣禮義之所繇出。咸之後受之以恆。謂夫婦之道不可不久也。故以恆其德貞爲吉。貞者。從一而終也。而先王制禮。夫歿妻穉子幼。乃與適人。何哉。蓋守節人情之所難。億兆之衆。其中必有艱難迫隘。而不得遂其志者。槩而責之以守節。則必有所不行。故稍變通於其間。以寬中人。而遏亂源。先王爲天下後世之心。良亦苦矣。宜與蓋有陳貞婦焉。貞婦姓邵。父邵公欲奇之。爲擇壻。得陳公之子名憲章。所謂古愚公者也。古愚公之繼母蔣姓陰狠。陳公爲桐廬丞。古愚公將往省之。貞婦縵縵焉。恐也。古愚公至。果暴卒。貞婦聞之。引刀自剄。賴救之僅不死。時貞婦有身矣。或勸之。倘生子承宗祀。卽古愚公未死也。旣而生子一經。後所謂懷古先生者也。乃陳公解官。

歸。蔣視貞婦若門上莠，必欲其他適。所爲躋藉之多方，謂其不能堪。自當去耳。貞婦以簪刺一目，盲乃漸釋之。又恐其疑有所讎也，曰：婦之生計易耳，自所受敝廬少田之外，佐之以紡績，不敢損大人升粟尺布。此以後母子稍安矣。懷古先生有至性，成幼而知母氏之以生爲苦，而爲己不死，吞悲飲痛以撫之也。日見母氏之夙夜勞苦，躬親煩辱之事，而習之不知疲也。又日聞母氏涕淚嗚咽，而教之以寡婦遺腹之子，無成則大不孝，不得爲人，非可與羣兒嬉也。以是懷古先生奉親之外，無嘉客，其褻身極整肅，自血氣未定時，卽著展季之節，讀書不臥不休，及補弟子員，愈益發憤。覃思聖賢經緯之奧，著述隱授，聚徒日多，以束脩得鮮衣精食上之。貞婦每爲愴然不樂也，病不許延醫，曰：吾豈容望切乎？七十四而終，直指宋公仕聞於朝，表其宅里焉。貞婦十九歸于陳，二十四而寡，尙未有子，遭戚姑之毒，以子之非其子可殺，婦於何有？昆蟲亦知逃死，貞婦以身殉節，竟能存遺腹之孤，成碩儒，豈不烈哉！豈不烈哉！安在其有志而不得遂乎？世人率無志耳，有貞婦之志，當其聞桐廬之變而死，亦謂之遂志矣，其不死，所謂天道運行者也。直指歲舉節孝，大都多貴盛之家，懷古先生一逢掖耳，能昭其母之節，聞於天下，可不謂孝哉！旌後十年，而孫于廷成進士，爲御史，以直聲著。

邵節婦傳

邵節婦者，觀察邵公永春之冢婦，太僕崔公景榮之女也。幼而聰明端重，言動不苟，女嫠侍之如嚴主，舅

嗣如也。教之書。得古淑媛事。喜甚。安得見之。太僕生子遲。奇之不啻子。十五適郃公子和鳳。姑曰苗恭人。如姑者四人。郃公子之母張也。諸姑情性不一。難事。節婦柔良恪慎。竭心力。聊調之。咸底於歡。孝哉之譽。夫婦並稱。郃公子才美勤學。好讀舊史。時時與婦談說善惡興敗之蹟。擊賞譏刺之。如對朋友。節婦心益曉洽。與郃公子相期爲古賢人矣。節婦生子壽兒三歲。而郃公子死。疾革之時。郃公子謂節婦曰。不悟將去汝。汝當春華時。其自爲計。節婦曰。何子之畜人以禽鹿也。有如不可諱。卽同死耳。郃公子默然。旣而復謂之曰。父七十餘老矣。兒幼。汝其無死也。郃公子遂死。當此時。郃公旣痛心垂老而喪壤子。又恐婦之相隨以死。而幼孫無依。則戒家人勿哭。使其姑守之。勸婦爲郃太孺人。郃太孺人者。郃公之母。郃公二歲而孤。郃太孺人撫之以至成名。朝廷旌其宅里曰。郃節婦。節婦志已決而不得死。每哭輒嘔血數升。病年餘竟死。年二十一耳。趙魏之間聞之。皆曰。郃公。崔公。當世之廉貞人也。在朝皆忠臣。固宜其有節婦也。節婦之所不爲。郃太孺人者。郃太孺人貧苦伶俜。不得棄幼孤而死。節婦生長富貴中。舅姑父母俱存。孤無可慮。故得以遂其志也。節婦歿未幾。有司聞之於朝。旌其宅里。亦曰。郃節婦云。

趙子曰。人恆言千金之子。坐不垂堂。胥靡之人。登高不懼。言生長富貴中者。難於死也。夫義烈之人。一視死生。何知富貴貧賤。人生常死時亦少。旣遇之。不能舍生。則不可以爲人。嗟乎。嗟乎。郃節婦。卽彤管所稱。何以加焉。世之士大夫。或有位至鼎足。白首甘喫詬而不忍舍。斯其人望之死忠死孝。能乎哉。

鍾節婦傳

鍾節婦者。鍾順溪先生季子正和之婦。鍾文學子緝之母也。父張公翰翔爲僉事。以病瘍早歸。日以列女傳諸書授卽婦讀之。每至貞順節義事。輒歎羨之。僉事公謂其母袁宜人曰。此女靈異可喜。恐非享康甯之福者。無何而僉事公歿。節婦兄沛太學能爲詩。余嘗爲之序者也。時禦外侮。袁宜人善病。藥艾食飲。節婦一切任之。坐臥一樓。偶失火。羣婢皆逃。宜人令之下。曰。兒聞宋恭伯姬之事矣。彼婦也。猶不避火。况女乎。竟不下。火亦尋滅。年十六。歸鍾季子。則鍾先生已歿矣。鍾先生舉進士十二年。而宅憂者再。三爲令尹。廉正不畏彊禦。轉南比部而歿。娶周孺人。生太和。岱和。及季子。先生歿未幾。而周孺人。太和夫婦。及岱和相繼夭折。四喪在堂。季子與節婦俱未二十。如天塌地陷。無復生理。此時子緝之生。纔一年耳。向之投爲義男者。皆化爲盜。而太和之一二執友。受賕潛助之。訐告以出。季子孤弱不枝。感槩痛靈。嘔血數升。猶力舉四喪。而後卽世。時年二十有一。節婦十九也。引刃自決。袁宜人奪其刃。舉子緝慰之曰。若能保此子。則汝夫有後。我老矣。汝死。誰爲撫育者乎。及殮。復以首觸棺角。入寸許。流血升餘。三月後始平復。竟以破傷風成痼疾。數年之後。乃卜殯季子於城南十里許村居之傍。以效廬墓之意。請袁宜人同居。延師教子緝學。越五六年。袁宜人亦歿。鍾先生無宦囊。僅遺田二百餘畝。節婦日事紡績。以爲尸饔之資。竟以頭風心痛。卻醫藥而歿。年五十三。猶及見子緝爲諸生也。歿後而有孫。今十歲。能讀書矣。夫人生之不幸。未有若

節婦之甚者也。自閨處之時。而卽在憂毒凶懼之中。目不得少乾。魂不得少甯。以撫孤之故。勉強而活。五十三之謂上壽矣。豈非執神堅固。不以生死動念者哉。雖烈丈夫。何以加焉。人命危淺。自憂熏之。而不天。意者天實相之。以不泯正人之祭祀也。子緝安貧好學。博雅有文。而所交與皆賢者。以行誼見重。其子復穎慧不凡。鍾氏其興矣哉。

江母汪節婦傳

汪節婦者。金華二守江清臣之祖母也。汪。歙之大姓。十九歸於清臣之祖。明年娠。六月而夫歿。將徇焉。而姑吳亦嫠居。曰。奈何棄我而就吾子。且焉知天之不以婦使吾子死而不死也。輒而生清臣之父。節婦孝養慈煦。竭盡心力。伯氏良弱。無捍先世之業。悉吞於邑豪。無以共賦政。走愬於公府。而道隕。里胥譁於門。婦姑泣於室矣。節婦事姑三十年。而送之終。清臣之父。以單子支門戶。日益窘迫。四壁僅存。而更鬻之。此時清臣有昏矣。其家竟告絕。曰。是安所取橐餕乎。節婦無以應也。而第語清臣曰。人情如此哉。貧乃至於失儷。惟學無貧。此孺子發憤之資也。清臣趨學甚力。通尙書。能古文詞。授徒致束脩。奉養飫於典雅。甚愉也。旣而清臣舉於鄉。節婦喜極而悲咽。不自勝。曰。吾茹痛飲泣。而撫若父。冀得成立。以不絕爾祖魚菽之祭足耳。不意爾能自致於士紳。又不意吾猶及見之也。蓋節婦是時七十有五矣。又四年矣。厥後宋直指以上民之公論。上其事於朝。表其宅里。於是天下皆知汪節婦。而清臣所交與。皆海內名人。爲詩文以傳。

清臣比輯之曰江母節行紀。汪節婦之父名一元。母黃。清臣之祖名樞。父名元長。清臣名湛然。趙子曰。甚哉人不可亡節。節生於恥。亡節是亡恥也。汪節婦二十而寡。撫遺腹之孤。極貧苦。以至於有孫。可不謂難哉。清臣廉貞少成。節婦之化也。縉紳以節婦重清臣。清臣行己居官。皆有美譽。節婦之名益著。世之稱夫人命婦者何限。其死也。率滅歿於荒煙野草之中。孰能舉其姓名哉。余同年江長信。清臣之族祖也。忠直剛毅。竟爲讒人所點灼。名沈抑而不章。悲夫。標季之世。節義多在婦女。公論常在閭閻。余因汪節婦之事。以觀今之人。不勝其嗟恨焉。

高能傳

高能。汾人也。與於趙魏之間。至廣阿。問馬氏。小與敵乎。曰否。穀匡乎。曰否。蓋嘉靖中。馬倖於汾。小與者。能父所爲也。至是數十年矣。能世其業。直三倍於他與人。惟所言不與主人嘗。性不食肥薰。然必細器。清茹。若飯名僧。有富家令與負養同食。能拂衣去。曰不得若直卽已耳。以是爲與。不召能卽已耳。至則不敢侮之。所需材。手自遴簡。或取其屑拭面。曰鹽不可用。必不可強。日昧爽。呼其徒皆起。無不極心力。有解嬾。輒大罵之。以是與獨精。語曰。空閱來風。桐乳致巢。故有佩璫而弗欽。帶索而見重。孔子所以興歎於滄浪也。高能一與人。趙魏之人禮之若賓。不以爲倨。直高而不以爲貪。嘗試論之。能口無二直。類信。見侮鵠起。類潔。信心求精。類不舍所學。耆力進事。類不素餐。士大夫乃有翁食舞利。甘唾罵而自得。受直甚高。徒敗

人之與。若使能而業儒。必不其然。余嘗使能與。見其人從容朴直。與他與人異。故論著其行事。

張守清傳

張守清。山西人也。少而貧。隨其母至真定。奴於諸生閻白亭之家。旣而逐之。之五臺山。諸礦賊鏹利交爭。數相殺傷。守清每爲剖決。片言輒服。時馬齊爲賊首矣。衆復推守清。守清再三辭不獲。乃居其次。甚推讓齊。齊猶不能容。衆皆勸守清殺之。守清終不聽。衆皆噤怒不敢動。而第諷齊辭去。齊遂自髡爲僧。久之。乞食至五臺。賊以報守清。則肅入山中。杯酒敘舊。仍留之共事。久之。又不能容。於是衆共殺之。守清於山中。聚工鼓鑄。分給衆賊。延師教其子。時時齋僧濟貧。晉中一二宗室。從之借貸。有與締姻者。中貴之五臺禮文殊。守清皆款接重餽之。長安漸聞其事。有二諫議使人嚇守清。得萬金。旣而今上問五臺有礦賊。何土臣不一言也。晉中當事者懼。以屬備兵使者吳君同春。將捕之。或曰。是不可捕。惟使人招之耳。招之果卽來。來則下獄中。初。守清不意爲賊所推。坐享富厚。久無事。守清能約束其下。立法場殺人。會有婦人朝山者。一賊以槍奪其冠。守清卽斬賊首示婦人。以是環山之民。皆獲安堵。守清以衆悅之。忘其犯法。至獄中。怏怏不食死。先是閻生有故人李姓者。爲倒馬關參將。往謁之。因之五臺。過守清。至其所居名鐵鋪。問張守清在此乎。衆賊皆大驚。且怒。入報。守清卽出迎。執禮甚謹。入則見其宮室器用如王侯。僕從甚盛。頃之席設。張金鼓。水陸之珍畢具。歌舞佳麗。酒罷。守清留之宿。閻生曰。吾將之倒馬關。李將軍所耳。守清曰。當

爲作書。閤生問何以識之。曰。素與往來。乃作書付閤生。厚餽之。見李參將。亦問何以識張君。曰。其少時不肖之厮養也。相與歎羨移時。守清死後。礦賊遂爲害。土人皆思之。

外史氏曰。昔管仲取士於盜。上以爲公臣。曰。其所與遊辟也。可人也。張守清起於人奴。一旦入山中。羣盜皆折服。守清聚而不貪。分之而不爭。殺之而不怨。此其才誼有過人者。且遇敵能讓。不忘舊主。使其讀書入仕。當爲賢士大夫矣。朝中當事者以礦寇平。上其功。云用兵剿之。大受爵賞。是時商洛間礦寇趙天植。爲害多年矣。蘇公濬備兵其地。曉風占。乘夜縱火。焚其板屋而擒之。竟不以聞焉。

味檠齋文集卷十

碑表

關王廟碑

古今之稱英雄豪傑者。公論已明。譽望已著。而余罕能信之。非余之好疑也。功業易立也。名譽易成也。惟其幽獨笑奧之地。舉心發念之頃。莫非天理。而幾微之私意。不雜乎其間。斯爲真人耳。有十英雄於茲。令其一一以此自反。則必有慙沮不能自信者。而余安能信之。夫負勇建功者。恆利於得藉。而植操矜節者。每壞於阽危。故有成之白首。而失之一曙。武安王關公。生漢之末季。曹瞞以項羽之資。假齊桓之勢。以興漢爲號。此應龍之厚雲。而騰蛇之濃霧也。王迹其行事。爲漢蠱賊。舍之而歸元德。卽曹瞞嘗得之。極其親重。甯爲橫草搃旗以報之。而必不肯留。此其君臣之義。去就之節。固已懍懍兢兢。至隆篤矣。然讀書知方者。類能勉焉。至其直衷貞志。靈行飈赴。不搖於毀譽。不撓於成敗。不怵於死生。則豈惟天下之人信之。卽姦雄如曹瞞。亦信之矣。蓋王之心事。如日月然。昭昭乎無可疑也。故剛大之氣。不與形而俱泯。而常存於宇宙之間。靈爽赫奕。長爲神明。蓋天帝神祇皆信之矣。夫天帝以爲臣工。而神祇以爲僚友。非信之而豈

其若是。故能翊贊大儀。匡扶皇極。福善禍淫。歷有徵驗。近日平湖陸太宰。剛方君子也。一要人誅之曰。向彼求太宰。若四肢之無骨。太宰之季子基志。畛之於王。父果以柔取位。子與有辱焉。然父實介立。彼誣人如此。神其察之。無何而要人三世湓殞。赤臭播聞。海宇惻冒。豈非王之震迅馮怒。奉天行殛哉。吾邑西門外有王之廟久矣。廟居臺上。與城門直對。令長晉公至。民功旣底。乃秩羣神。於王同里。尤所尊奉。見廟宇狹小。乃拓而新之。廣袤俱倍。爲殿三楹。剝如之。左右廡皆如之。爲樓以置鐘鼓。規模軒敞。丹青赭堊。煥爛景彰。始於三十八年九月。至四十一年四月落成。屬余爲記。余觀長人者不知敬民。則必不知敬神。故夫子論仁。以使民如承大祭。然亦有民之不恤。而崇祭祀者。無亦自慮其獲戾而求解免焉。是媚也。非敬也。如王者豈可媚哉。晉公忘己厚民。立公滅私。其心可以質之於王而無愧。余能信之。故於其修王之廟也。樂爲之記如此。

明通議大夫兵部右侍郎見泉魏公碑

世恆言今人不如古人。必大愚也。爲此言者。天之生賢人君子也。其猶世家之積寶玉乎。或數年。或數十年。或百餘年。而得一焉。然猶有真有僞。真矣。猶有高下。品質精光。萬相絕也。世所稱賢人君子。亦若是焉矣。若南樂魏公也者。以求之古人中則易者乎。魏公諱允貞。字懋忠。別號見泉。世爲大名之南樂人。其先世可考者。自良興始。良興生剛。剛生昇。昇娶於黃。生泰。泰在母腹。而父見背。黃貧苦守節。撫之成立。泰生

經以勤儉大其家。娶於王。生封巡撫節齋公。魏公之父也。諱怡。以明經爲別駕。行廉而德厚。趙魏間稱爲大人。年九十六而卒。娶於王。無所出。繼娶楊恭人。生三子。長卽魏公。次允中。庚辰進士。官吏部主事。次允孚。甲戌進士。官刑部郎中。文章氣節。並爲時論所推。公兒時。內穎外方。屹如成人。比就師。日惟讀書。不知嬉戲。十八爲諸生。庚午遭母喪。過毀。病幾殆。公配趙恭人。夢有神告之。而家病者。胡不服黃蘗。公取服之。果愈。丙子舉於鄉。第十四人。吏部公舉第一。丁丑成進士。授荊州府推官。荆俗剽悍。善訟。多疑獄。累年不決者。公謄律。聽情。悉斷遣之。時江陵相。擅權作威。官其地者。率以畏之太甚。柔橈求容。惟公與觀察馬公文煒。廉貞自植。民賴以安。皆稱青天云。而張氏奴有不逞者。衆咋舌莫敢問。公獨繩以三尺。未嘗不見容。而更取重焉。壬午徵爲御史。會江陵物故。遺表薦其私人潘宗伯晟。允已而相。爲身後之利。御史雷公士楨疏論潘輒猾。不可相。上竟相之。公疏極言潘品下齒衰。衆必不服。彼必不止。所謂苟患失之。無所不至。其爲聖治之累甚大。疏入不報。然亦竟不復用。公在臺中。曾不踰歲。時江陵初沒。執政席餘威。蒙遺事。未能遽偕大道。公所糾正甚多。旣而陳四事曰。公文武之用。嚴科舉之防。慎臺諫之選。務戰守之實。語多侵執政。而張公子聯翩高第。遂爲相庭之故事。駸及諸有力者。肆無顧忌。所言科舉之防。尤執政所恨。遂降公許州判官。戶部郎中李公三才上疏救之。亦降東昌府推官。頃之魏公陞南吏部主事。李公南禮部主事。與澄海唐公伯元同舍。南吏部事簡。獨胥吏有貼班銀。以佐四司僕馬之費。太宰邱公樞。少宰海公瑞。

皆名臣。公請如此類悉革之。省署頓清。而此時鄒公元標。繇建言遣戍。爲吏科給事中。復以言事調南刑部。長垣李公化龍爲工部。數公者多暇相過。登山觀水。講德論文。每聯鑣出游。望之者若列仙也。蓋如是者二年。而聞仲氏之諱。公不勝痛念。老親其何能堪。疏請致仕。吳江相寢之。而徙公光祿丞。過家殯仲氏。以太公之命入都。數月而有諭祭秦藩之命。公爲正使。大行膚施趙公查副之。趙公年少有志節。自乘傳廩給。與秦藩餽遺。不下二百餘金。皆無所取。公爲丞。陞少卿。念太公請告歸。三年而家拜順天府丞。陞右通政。無何陞山西巡撫。至則條上五事。曰。選授得宜。則吏治修。支放足數。則軍情悅。屯鹽不虛。則國計實。宗室不犯。則國體尊。禁林不伐。則邊防固。皆得報可。天下風俗駸汙。官邪日甚。山西文武吏奉公教令。兢簠簋之飭。平陽守歲所節省數萬金以報公。極其休讚。用充平陽一歲租。於是有司條議裁革者衆。或過于刻削。公還其奏曰。非人情也。山西巡撫每歲交際費千金。及酒課數千。皆橐中物。併贖鍰。不下數萬。公著爲憲約。凡撫按交際費。不過二三金。他罕所餽遺。公以汾州有二郡王。宗人多。軍民雜處。州守官卑不能制。奏改爲府。山西自款市之後。邊備日弛。公親歷其地。視要害。覈軍實。建議整飭。忻州崞縣方山鎮。其城土也。易以輒石。而黃龍池。草垛山。河會水。泉石茆等處。皆創爲堡。設官養兵屯守之。發人徒。修築偏關老營等處邊牆萬餘丈。督造鎧甲戎器。市買驛馬。所費不下數十萬。復以其餘助大工征討。又修文中子諸賢之祠。及書院。陶化人才。凡皆取諸其所節省。他人所云橐中物者也。一時山西吏治。甚有文理。閭

閭安樂。德威燦乎方外。值宮殿災。新建密以開礦之說進。而武弁仲春等爭言礦處。公上疏言。人主玉食萬國。何以開礦爲。頻年貶逐諸臣。其中豈無忠臣義士。有一人焉。可抵萬黃金。不此之寶。而發天地之藏以求利。諸臣之爲計亦左矣。疏入不報。而抽稅之議起。公不勝憂國憫人。乃陳君臣交警之謨。責新建以嚴嵩夏言爲戒。蘭谿以李本爲戒。又言去年二臣以二月加恩。而三月兩宮火。今年又加恩。而三殿火。天意甚明。臣誠不忍陛下爲二臣所誤至此也。疏入。奪五月俸。自是山西中使張忠孫朝。及他省陳增高懷魯保馬堂等益橫。文武吏士人選其意者。每累繫於千萬里之外。而有司候選臺省。久留京邸不下。公上疏言。陛下何重宦寺而輕言官也。疏入不報。而中使遂舉劾有司。典史驛丞等官。往往斃於凌虐。公上疏自劾。不能爲吏民延旦夕之命。臣罪宜罷黜。疏入又不報。則遂挺身扞之力。搢其爪距。其輩氣讐。見公不能出一語。公不少假借。其輩大窘。遂奏公沮格礦稅。而誣以八年公費酒稅等金數十萬皆入己。上下其議。部院諸大臣於是九卿合詞上言。撫臣某清苦之節。天下莫不聞。彼既參內臣。內臣亦參之。詆譎相報。天下共知其枉。疏上不報。而南北臺省之疏俱至。山西吏民數千人叩闕籲留。事遂寢。中使之疏上也。公所興建諸領其役者。及支給之數。一一掄記。至是出以相質。錙銖不爽。自酒稅贖鍰等金之外。廩給乃其餐錢。亦以爲公用。至太公諸公子往來。皆以俸金雇車馬。所過傳舍食飲。計所費償之。傳吏以報。於是衆益驚服。固知魏公清。非有中使疏。亦不知其至此。公撫晉九年。執政者恨其鐫譙已也。屢推卿貳不動。求

歸養者二十餘疏不下。至是乃得旨。卽日命駕。軍民遮道號泣。皆爲祠祀之。而祠在太原者。李本甯太史爲之記。公侍養太公者一年所。而太公病。性不嗜藥。公率子姪焚香禱於天。請以身代。竟不起。公年已不毀矣。而哀摧幾絕。公天性孝友。而父子兄弟皆賢達。入以道德相敬愛。出則以忠貞相勸勉。退則以經籍爲娛。人品至魏公。不必更言其清。然今之清者。殊亦易爲。何則。清名成而家亦富矣。律之以魏公。能乎哉。且其人率貪位。末路多舛。龔蒙譏。魏公爲國家生民。乃不知有死生利害。故能信心孤往。無旁顧卻慮。癸巳。余筦京察。被逐。冢宰餘姚孫公奪俸三月。公上疏直言執政喪其私人。非至尊之意。執政恨入骨髓。一時同救余者。如李公世達。王公汝訓。曾公乾亨。輩皆去。而公留。以爲能容矣。撫晉又數譏刺之。故必不令其入朝。大旱霖雨。僅及一方。惜哉。公生於嘉靖二十一年六月初七日。卒於萬曆三十四年正月十五日。享年六十有五。公之歿也。余貽書當道者。謂宜破例優卹。不言及諡。以公之名德駿業。能聞雷霆見日月者。舉知之耳。而卹拘於例。竟未有諡也。夫亦何足爲公損哉。公子以墓碑見屬。乃竭翬髦之思。摛爲讚頌。用垂來遠。其辭曰。

俟候魏公。若龍若神。望見之者。則莫不震。侃諤立朝。排檄柄臣。奪之言官。冀其默泯。大節之整。抗疏直陳。豈惟博謔。曰報國恩。出撫於晉。身遠而尊。吏化廉清。民戴其仁。上帝憚怒。惟利之云。山毀淵枯。雞犬宵奔。公念皇輿。泄泄是箴。替不斯畏。忿溢彌深。進則擠之。退鑷其輪。織人乘之。惡言上聞。萬衆稱誣。公道以伸。

九年於外。九表之親。釋煩歸養。白華可珍。終其天年。歸於斯墳。佞鬼羞避。先哲爲鄰。有美仲子。鳳畧之寶。手繙寶書。厥德嶙峋。論譔垂世。云胡不欣。人生得志。無念後昆。

明中憲大夫都察院右僉都御史念冲晉公墓碑

夫天地之所覆載。名之曰宇。宇也者。宮室也。宮室也者。必棟之以木。礎之以石。木取其不撓。石取其不礪。若束蒿荻以爲棟。而搏泥滓以爲礎。則宮室不成。夫剛方直節之人。天地之棟礎也。而不便於小人。小人恆欲摧折之。彼勢勝而日巧。則此敗。然前敗而後續。必不絕響於世。若世無此人者。則蒿荻泥滓。何足以支持天地。而天地且淪沒矣。余求其人。得洪洞晉公焉。晉公名應槐。字植吾。別號念冲。七世祖冕。生勝。勝生統。統生鍾。鍾生偉。爲元城丞。偉生朝臣。舉於鄉。爲和州守。和人祠祀之。擢戶部員外郎。以公貴。贈都察院右僉都御史。配張恭人。妊公而夢龍蟠於庭之槐。遂以名公。公敏而好學。蚤年爲名士。嘉靖乙卯。舉於鄉。年二十三耳。明年成進士。授中書舍人。擢吏部稽勳司主事。久之典選。時承分宜嚮爵之後。有司之遷轉。漫無所據。入貲者其人既多。而復有加貲。流品猥雜。後先貿亂。公自郡寮以下。造立俸簿。書其年勞薦牘。而入貲者區分類合。各有定次。名曰選規。奉行之。繇是統均之地。規矩始設焉。而請寄時有公。一切拒之。卽華亭相黃少宰。不能得之於公。側目者衆。時大司馬楊公。公之同鄉。勳名甚盛。士爭附之。公秩滿。楊公請以其子代。不許。及公擢太常少卿。而楊公爲太宰。楊太宰才臣。然多私。隆慶己巳。管內察。尤不喜直。

節首擢何以尙曰此輩以天下事惟其握持在所矜嗜公謫運判稍遷廣平府同知會新鄭入相公遺書大略謂新鄭才高性急宜稍寬大和平新鄭不能用然感公言蓋新鄭爲少宰時知公公蓋報之云無何轉河北僉事久之轉河西及固原備兵使者公見事卽知其利病絲紛者立析盤錯者立斷所至皆有名迹軍民便思之萬厯甲戌奉張恭人之憂歸里服闋除湖廣兵備副使至則覈其屯田姦豪侵奪者悉寘之法刊屯約四章垂永久焉無何擢參政分守湖北榮府承奉死於酖理官受賕欲絕其獄公竟正法又發薛弁暮夜之金巡撫王公疏其事上命紀之擢湖廣按察使時景王府第火坐探樵者七人公廉之實府官羣飲所致竟移其罪而釋七人有力者爲之居間終不聽擢湖廣左右布政時江陵相宮鄰金虎之勢已成有司腴民膏奉之恐後公悉革之歲壬午當大比士江陵之諸子皆已升第都華臚矣至是欲錄其少子而授意其親王篆使武昌守曹愼以屬公篆之子亦與焉公不許於是擢公撫甯夏而調貴州錢布政藻代之篆使給諫李廷觀草疏論公未及上而江陵死矣公爲方岳四閱月而臺使者取其行事鐫之石以示後來其撫甯夏時方興互市馬苦多徒爲中國蠹費公議減若干公雖與其事內實有備威不可犯而明不可欺是以姦人莫能生事而著力免黃台吉遵公約束無敢譁釁靈州士卒戕其主帥邊廷震驚公赦其脅從而誅首惡遂定先是公在河北有礦賊之亂議者欲兵之公第密令一武弁與勇士二十人爲賈客入賊壘擒二十餘賊餘皆逃去而靜甯回賊之亂亦以計散之而已曰殺人邀功吾不忍爲

也。其持重有方略如此。公再以大閱。欽賞加俸。且大用之。而南都之彈章至。楊鳴鳳之所爲也。楊鳴鳳者。所謂湖北理官者也。此時爲給諫。故所彈皆楚事。楚直指任公養心。正人也。核其事皆無有。更薦之吏部。以原品調南都。公年僅五十耳。前後典選者。鮮不徑至大官。公被摧折。欲爲其所未爲。故復出。至是遂絕意於仕進。而優游以老。公事親克孝。承顏寧意。仕宦奉入。悉以上太公分之諸弟。事繼母李如事張恭人。居家與子弟及門下士所言。大都在不失赤子之心。邑城及學。皆首唱修之。士民頌德。其振人之急。而救其死喪。明其侵冤。甚多。公自謝事歸。則卜築於邑北五里許。曰漁樵莊。軒曰無思。山翠溪聲。林光竹氣。甚可樂也。公日偃息其中。作漁樵莊說。意甚元遠。公閒居二十五年而卒。蓋萬曆丁未七月也。至庚戌。公季子爲鄆大夫。以郭美命先生之所爲公志銘。示趙子請碑焉。趙子曰。余嘗從選部之後。見晉公所爲選規。歎其理劇之才。又因是以知其清。夫墨者不規也。黃少宰者。閩人也。名昇。嘗言吾閩有會館。鄉人之仕者。無崇卑。皆醵金而藏之。賂者取給焉。自晉公典選。毫釐未動。此亦前後所罕見矣。晉公爲臬時。郭先生爲弟子員。公國士遇之。乃爲楚藩。余友魏懋忠理荊州。及懋忠撫晉。而公在里中。具知其居官居家事。向余道之。如郭先生所稱。郭先生與余往來。相慕用深。二公皆剛方直節之人。宜其知公也。鄆大夫懷霜甘檉。疎濯塵外。聞一善立見之行。信心直前。責育不可奪。任未幾而黎民歌之。斯可光昭先德者矣。乃作頌曰。神明之葉。自邑萊敷。乃誕英人。協於哲符。克明厥德。秉心不渝。爲天官氏。灑滌塵塗。若坎若律。威富莫覲。

嗟彼三事。惟斯是圖。嗟彼諫臣。惟賢是誣。彼願既逞。公亦自如。允文允武。威殫惠濡。楚氛誠惡。薑逃匪殊。就克佩蘭。與爾熾趨。運命之至。耳亦生車。小子謏謏。言返初廬。霍麓有泉。有荷有魚。有雲有煙。樂且無虞。生有榮名。歿垂令模。鄙民清康。維公之都。

明南京光祿寺少卿涇陽顧公碑

顧公名憲成。字叔時。世稱涇陽先生者也。其先不知何許人。宋有將士郎百七公者。始家上舍里。數傳至廷秀。商文毅公爲表其墓。再傳爲如月公。諱麟。又三傳爲友竹公。諱緯。邑諸生。公之曾祖也。父南野公。諱學。始居涇里。以公貴。贈戶部主事。母錢封太安人。生公兄曰涇田公。性成。仲曰涇白公。自成。弟曰涇凡公。允成。公自采紉受書。卽多夙悟。十歲讀韓退之諱辯。每遇南野公。諱輒避之。然不可勝避。所鬱不樂。師問知之。以告南野公。昔韓咸安王諱忠。語其子曰。汝諱我是忘忠也。夫忠可忘。則我可忘也。自是遂不諱忠。南野公喜。以告公。學之不可忘。亦猶忠矣。公謹受教。公少時家貧。不能延師。就學鄰塾。歸必篝燈誦讀。恆至達旦。其爲舉業之文。握管立就。瑰朗新妙。而雄逸之氣。飄馳江決。不可圉也。隆慶庚午。試爲邑諸生。萬厯丙子。舉於鄉。皆第一。其冬居南野公之憂。庚辰。舉進士。爲戶部主事。海內學者。翕然稱公之文章。宗尙之。然公篤志孔孟。及宋大儒之學。潛究默行。不屑爲文章之士。是時江陵當國。方橫舉國若風中之蒲葦。公與南樂魏公允中。漳浦劉公廷蘭。慷慨論議。持天下之名教是非。江陵聞之不平。以語申相國。申相國。

三公之座主也。三公皆上書欲其匡救江陵。然江陵固不可救。亦未敢輿公。壬午江陵大病。舉朝釀金爲祭。禱於神。公拒不預。同曹代爲署名。公使人塗滅之。江陵竟死。申公及新安太倉秉政。以公爲吏部主事。尋以錢太安人年高告歸。丙戌除驗封司主事。明年考察京官。時辛公自修爲御史大夫。而海公瑞爲南御史大夫。執政羣小咸憚之。於是御史房寰醜詆海公。此時涇凡公成進士。遂與同年諸公壽賢、彭公遵古同疏劾寰。皆放歸二年。然後用之。學官涇凡公之直聲震天下。稱二顧云。於是辛公司計。當路皆喪其私人。惡之。而工部尙書何起鳴被劾。人有謂何若能去辛。可以德執政。卽同歸暫耳。何大喜。遂託辛公。而給事中陳與郊等並劾辛。何以戰國從橫實圯辛。而辛何果并罷去。御史高維崧、趙卿、張鳴岡、左之宜。皆以劾起鳴降官。公乃上疏言何起鳴。計辛自修。旣罷自修謝之矣。而又降四御史。此皆出朝廷意耶。降四御史以承望。彼陳與郊等。顧非承望耶。疏上。謫桂陽州判官。日與諸生講學論文。戊子轉處州府司理。司理刑官也。公專以孝弟教人。多所感格。己丑居錢太安人憂。辛卯司理泉州。壬辰鄒孚如爲考功。管大計。舉公廉吏。尋陞考功主事。吏部從來無出而再入者。非孚如不能爲也。時上久不立東宮。至是詔與兩皇子並封。云待嫡嗣。其時首相則王太倉也。上殊信任之。公唱四司上疏。言臣等稽祖訓。東宮原不待嫡。元子并不封王。且陛下建儲之期屢改矣。今日待嫡嗣。是無期也。又貽書太倉切責之。太倉懼禍。并封之議竟寢。人以是知太倉所欲爲。無不如意者。而第假上以行其私。癸巳公爲司勳。鄒公元標已投之南刑部。

求去有旨放之去。公力勸太倉疏留。勉從之。及餘姚孫太宰罷。推代者。時少宰趙公用賢署吏部。太倉屬以推羅宗伯萬化。宗伯翰林也。又其氣類。故欲用爲冢宰。以盡收大權於政府。公曰。往者內閣之推。不專在翰林。今已專據之矣。而復兼冢宰。是翰林之外空無人。也。此斷斷不可。少宰以告太倉。太倉恚甚。然其意遂格。而陳公有年爲冢宰矣。及公典選。有會推內閣之命。舉七人。山陰王公爲首。而宗伯不與焉。太倉益恚甚。曰。羅君推冢宰。曰。非翰林所宜。今推內閣。又不可。何也。復以屬陳公。陳公不聽。而王給諫彈宗伯疏亦至。公遂削籍歸。而陳公亦竟去。給事中遂公中立上疏力救公。亦見黜。先是公見羣賢被播者日多。欲漸汲引。非太倉之意也。值其假沐。而推孟公一脈。王公德新。輒得旨。太倉佯喜。謂公曰。此機括甚佳。自此益亟推舉。欲以爲激上之怒而除所忌。又委過焉。自公去。而懷忠持正者無不得罪。林下充實。吳中尤最盛。是時涇凡公亦得罪歸里。公兄弟與羣賢時聚而講學。其學惟就孔孟宋諸大儒之書闡明之。溫故知新。不離乎區蓋之間。高明者聞之可入。始學者聞之不駭。久之。白當道爲東林書院。大會吳越之士。講學其中。東林之名滿天下矣。戊申。起南京光祿寺少卿。命偶下。公知當道無意用之。不出。旣而推京兆不下。易以他人。又推僉院爲陪。時富平再出爲冢宰。其先爲冢宰。乙未。管外察。黜馬督學。猶龍。丁參政。此呂等賢者。少司馬沈公思孝。面非之。遂上疏得旨。逮此呂羅致之。遭戍而死。富平猶恨沈公。而又有言沈公欲奪之位。及淮揚巡撫李公三才。亦其所不悅。李公方被羣喙。公貽書政府及冢宰。言李公在淮揚。能

制稅璫不敢動。安民弭亂之功甚大。其人磊落。非暮夜受金者。又言沈司馬馬督學之賢。富平怒語人曰。吾已容之矣。於是一二攻李公者。語稍稍侵公。公惟自返。不與稽也。又其甚者。以東林爲詬。駭及海內廢棄之人矣。論者以江陵刀劍也。其害雖慘。而有所不及。繼其後者。猶天地之害氣。氤氲於風雨霧露之內。依託於雷霆震電之中。以致其毒。爲害甚烈且深。公竟不用以殆。善類咸悼之。南野公故豪傑之士也。顧公爲諸生時。在位者或念其貧。有所餽遺。南野公一切不受。顧公早捐俗情。屢空殆庶。蓋得之庭訓焉。公生於嘉靖庚戌八月七日。卒於萬曆壬子五月二十三日。年六十有三。配朱氏。封安人。處士怡橋公女。生三子。曰與洵。太學生云云。王孝廉以高雲從之所爲狀來鄙上。屬趙子爲之碑。趙子曰。余自壬午與顧公同爲戶曹。顧公已講學矣。余樸鄙任真。顧公乃厚異之。癸巳。余筦京察之役。顧公再入銓部時也。其教我甚多。余被罪。太宰餘姚孫公亦奪俸三月。公與李公復陽同疏救之。不理。而涇凡景從諸公皆貶官。無何。公亦削籍去。大抵太倉之權也。而太倉再被召。公猶惓惓望之爲善。及所上福清富平書。望之破囂錄善。去私效忠。蓋其憂天下之深。愛國之至。不暇計其可與言否也。時貴以其異己。遂詬及講學者。夫無論其講學。第觀顧公弱冠通籍。二三相國皆同鄉愛之。江陵死。卽拔之要地。顧公以救失爲報。無姑息之意。二三公者。見謂負心。恨不可解。此固超出恆情萬萬矣。其於名教是非。社稷安危之計。無不挺身立爭。竟至罷官。其居家。非孔孟之道不談也。善無鉅細。無不爲也。行無隱顯。無不兢兢也。一事之美。一節之立。不足

以稱之。豈非慥慥君子哉。鄒爾瞻亦講學者也。以言事遣戍。旣復其位。而旋錮之。講學者皆欲忠國家。於身無所利。倘亦可以無苛咎乎。嗟乎。顧公不死可也。然死可矣。余與公相知深。靈陶之紀。寧可遜謝。其詞曰。

三五旣遠。鳴鳥噓天。哲降非辰。世道是肩。進思盡忠。直行抗言。抑撥薦蠶。斬社稷安。元老日呼。庸爾余患。佩之以玦。不復爾還。仲尼素王。堯舜讓賢。厥惟素臣。何愧九官。邪說亂正。吾道之姦。昌言排之。夷庚匪艱。兄弟同道。黜焉雲。混沌未期。聲名永傳。

明文林郎浙江道監察御史雷公國柱墓碑

公諱士楨。字國柱。秦朝邑人也。世居邑南十里之新市鎮。高祖遜生景瑞。景瑞生寬。寬生世濟。是爲公父。南河公以公貴。贈御史。配韓大司馬恭簡公之仲女。封太孺人。生公。生而豐厚端凝。五歲時。言動卽如成人。不輕嘖笑。通九九之術。六歲。從師授書。輒知大指。時時爲同學兒解說。師聞之大驚曰。予不足以師之。無何而從恭簡公學。恭簡公甚愛之。每出游。則抱之輿中。所過門署坊扁。一見不忘。時舉古人格言。執行告之。欣慕之情。知於顏色。十歲。爲文有驚采。請就試有司。恭簡公不許。而取朱子綱目五經七書。俾讀之。盡通。及爲諸生。名隱隱動三秦。二十六舉於鄉。三十升第。授太常寺博士。太常志疎略。而居其官者罕明掌故。每祭祀。乃蒼黃求之士隸。公窮搜博訪。作太常考八卷。又議修九陵祭器。倍之以防損失。迄今賴焉。

三載考績。贈封其父母若妻。旣而聞太孺人病。圖歸。會上大婚禮成。奉使頒詔。畿輔三晉。便道歸。日夕侍太孺人艾藥。四閱月。太孺人竟不起。哀毀誠信。情義俱至。雷氏自高祖而下。皆權厝異穴。至是乃卜地於鎮北合葬。仍創建宗祠。祀先考妣。服闋授御史。三日而劾新昌不可相。先是江陵氣餒方盛。遘虐疾甚。其黨以二子之在詞林者資淺。詐爲遺疏。薦新昌自代。以漸及二子。爲無窮之計。新昌輒熟人也。常踐踐江陵門下。故薦之。時有二見相。俞旨下。遂躋其上。當此時。楚氛乍息。復熾。人人自危。公疏入。人人爲公危。公意氣甚閑。後新昌竟罷。蓋江陵於上冲年時。爲相久。竊大權極橫。其身後惡德悉彰。天怒斯赫。言官率吐枚奮詞。撻撻批擊。迎合上指。以得驟貴。公獨先言不居功。嘉靖中楊忠愍公以諫謫尉狄道。忠愍公故恭簡所舉士也。入關來謁。時公九歲。從傍窺忠愍公容貌。聽其言論。壯之。羨之。忠愍公去。曰。眞丈夫哉。作人不當如是耶。恭簡公益奇之。語門人張明傳曰。此兒他日立朝。必以諫顯。第慮其過激。吾老不及見矣。子後當以吾意語之。公果以諫顯。而不激。又守勿欺之訓。畏受賞之譏。君子謂韓公知人。公能用韓公之教。公受命巡漕。漕運有定期。往直指多方督趣之。恆後期。公約法簡易。而運舟早至。巡漕一切經費。所設苦少。公僅用其半而足。直指薦吏皆有謝。武弁尤厚。公槩無所納。公在丹徒。傷於溼而病。又聞韓孺人不諱。於是謁告歸里。四方士負笈來學者接踵。公教之先行誼。每升講堂。諸生以次質疑。皆爲剖析不倦。暇則爲詩文。皆關世教。中丞王公曾薦之於朝。公無意出。然壽亦不延。公卒時年四十五耳。公天性極孝友。南

河公之友劉處士公事之甚謹。親行父執之禮。嚴事兄士煇。一衣食不敢先。卽有所督過。愈愈唯唯謝之。不以既貴少改。兄五子。爲延師教之。束脩之費。兄不必問也。常恤人之貧。而自忘其貧。又好買書。故數稱貸。嘗貸麥至門。則貸者分什二三。曰我微生也哉。比卒時。則尙負人數百金。謂其兄某知己不責償。某宜速償之。公三十五時。夢巨人告之曰。公自是以往十年耳。公生於嘉靖乙巳正月四日。卒於萬厯己丑十月六日。竟如所夢。公父南河公孝友寬仁。鄉評推重。膠州張姓者。以戶部郎謫佐同州。素酷暴無罪。而極南河公以斃。公訴之當道。當道者置不理。公鬱鬱嘔血數升。幾死者數焉。而暴吏尙欲併害之。以立懂。太孺人不敢哭南河公。而日寬喻公。彼當道庇酷吏。以進士耳。兒盡努力報父之讎。公因自號雪菴。比成進士。則酷吏疽發背死。乃更號慕菴。公痛父之不得考終。仕進之心頽。又年大無子。則日夜焚香祝天。願生子。無絕先人祭祀。不願爲官也。四十二而生子壯。先是公以辛卯正月九日卜葬。其姪奮揚持馬。顧甫符卿所爲狀。來求墓碑。余未命筆。久之壯爲諸生矣。至今年己酉四月。壯來。趙子曰。世不乏稱君子者。然多不可知。若國柱者。余以爲眞君子。國柱進則營職。不顧利害。退則行意。不慕好爵。國柱督運天津。余方司倉。與之坐談頗久。氣時餽結優啜而不舒。蓋其終天之恨。根心難拔。視天下榮祿聲華。皆堪切怛。以故其德日進。而無經營四方之志。使人不能無恨於酷吏也。爰勒貞石。以垂不朽。其辭曰。

神皋孕靈。河嶽秀華。質茂文斐。允迪中和。聞善夙悟。如雨雨沙。步趨先民。靡逸靡頗。鳳凰來儀。光於邦家。

乃情雲壑。考槃以適。禹念羽山。終身咨嗟。矧遭豺虎。窮奇實多。寂寞耽道。以俟山阿。維彼凶人。千載見訶。惟此碩人。千載詠歌。有位鑒哉。豐碑峨峨。

明中憲大夫河南按察司副使慕竹延公碑

延公名論。字魯緒。其先開封人也。八世祖泰。徙平定州。生居智。居智生文質。文質生昌。爲冀州守。昌生定之。爲曹州守。定之生鶴年。鶴年生鏹。鏹生世爵。公之父也。以公貴。贈朝議大夫河南布政使司左參議。母葛氏。累封太宜人。贈恭人。公生而樸茂融朗。弱齡敏學。十八爲諸生。卽稱名士。又六年而舉於鄉。山居教授。北面伏膺。受業者甚衆。多譽髦之選。又十年而成進士。初試鄆縣。未期大康。王公奏改會寧。以會寧近邊。火酋敗盟。欲犯塞。故公至。則首先自治安內之計。乃具火礮藥數萬斤。買馬三千匹。經略大司馬鄭公。西寧之師。及哮劉之亂。實賴公之積儲。以克成功。監軍梅公薦之。被徵。塗觀小言。謫睢州判。僅以前功受賞二十金。頃之陞臨江司理。尋陞南京戶部。典計多積羨。晉南兵部職方司員外郎。再晉郎中。時少司馬許公孚遠攝本兵事。許公道學眞儒也。雅敬任公。以倭平受賞。此時銓部用人。常不得俞旨。推公江西僉事。備兵寧州。三年凡十一上。而奉太宜人之喪。以歸。讀禮之暇。羣弟子復集。談經講藝。人人樂其條暢焉。甲辰。出補河南驛傳道。未及。擢參議。分守河北。秩俸之外。一錢不入橐。買田若干畝。曰公田。若干畝。曰學田。糴穀若干石。以備旱乾水溢。士民之振救。丁未入賀。便道過里中。不欲出。而河北士民。請於中丞沈公。

趣之。奏晉副使。巡河北。買田積穀。如其守分時。己酉。復入賀。過里。尤不欲出。而此時河北大旱。捐瘠滿路。當道日趣之。公惟賢者急病之義。倉皇之任。發所儲。又請於中丞李公。得金七萬。粟一萬二千石。猶不勝振也。又走汝南。謁直指曾公議之。時方炎燠。公以憂民內熱。行赤日紫塵中。至鄆城而病。勉強至西平。遂不起。時庚戌四月二十六日也。公廉潔得之天稟。而平易近民。惻怛發中。有饑溺絲己之意。會寧懷慶州。皆爲立祠。其在南職方時。白下通人聚靖海寺。推蘇州大猾秦姓者爲首。曰。將爲國家定倭亂也。許公以爲奇士。欲倚以建殊異事。公力請驅之。不聽。欲露章上聞。許公悟。乃漸解散。其持危定傾之才。又如此。用之未究而歿。憂世者惜之。公之子國祚等屬余爲碑。往者余識公於京邸。不謂不余忘也。余於親趙給事爲通許令。公時掌驛傳。愛之。忘形款洽。每見則精問余動定。至飲酒諧謔之語。皆得之。不勝喜。己酉。以入賀。訪余泝上。杯酌敘懷。不啻久要。其好賢愛士。又如此。公次子國禔。遂來從余學。嗟嗟延公。世之仕者。安得此行此才。卽有之。又安得此心。宜爲讚述。以詔來茲。碑延公者。非余而誰。其詞曰。

矯矯延公。霜清繩直。文能見愛。武克耆力。軒翥將翔。而摧其翼。亦旣用之。莫究厥施。二邑三郡。惠止於茲。大命亦訖。誰能不悲。維命之訖。以救民故。天降饑饉。億戶壓路。五內初剝。捐生弗顧。存者聞之。標心於明。活我須臾。公也以傾。歿者聞之。叩首於幽。民之無祿。公胡弗留。河朔遺思。不啻桐鄉。萬口所祝。苗裔永昌。

明勅贈吏科都給事中繼川魏公碑

天下固少君子。而又有僞者以亂之。二者同稱。而僞君子有享其利。夫訓格之言。可勸襲也。中繩之行。可假託也。以此欺真君子。而幻化多端。以周時俗。此富貴之所必求也。既富貴。則其爲君子益易。若命運不利。則本相出矣。真君子者。其視貧賤富貴。皆可以爲善。而貧賤之致尤佳。譬諸九夏之炎燠。不若秋氣之清涼。宛洛之繁華。不若林皋之岑寂。故貧賤不萌富貴之想。而富貴恆有貧賤之意。以吾所見魏孔時給事。其人也。當此時。臺省最爲雄豔。而孔時德若草野。邸舍卑狹。余每過之。淹坐。無叩門者。其議論皆出獨見。所彈劾不避強近。余折服之。因是以知其父繼川公。則固真君子也。公名邦直。初名德成。字君賢。世居嘉興。後徙嘉善。父南川公。名祥。配楊。生二子。公行二。生而從祖抱爲子。後復歸。母卒。南川公欲從俗火葬。公甫六歲。哀號欲絕。南川公感之而止。稍長。業儒。不售。辭師事親。既娶。今贈儒人薛。歲饑。家日窘。繼母周亦舉一子。別居矣。周復舉季。同母兄慍曰。是安得糠覈乎。南川公趣水之。公以身覆翼之。南川公感而止。頃之。薛孺人生女。並乳之。從祖竟無子。家頗溫。公以季代爲嗣。季得讀書。成諸生。公與叔弟分產。惟所欲。稱不便。又惟所易。其負責爲買產。以償嘗病疫。家人皆遠之。公獨昕夕視醫藥。叔弟起。公亦無恙。季患瘵數年。公視之如一日。時里中苦徭役。中人之產立斃。且不勝追呼之擾。公獨力肩之。以服父之勞。而代兄之貧。既而孔時生。曰。有子矣。奈無以養親何。乃應鄉人之聘。爲童子師。從之者衆。一一隨其資之敏鈍而教育之。察其性之馴戾而陶鎔之。其恩勤周篤。不異己之子弟也。時有看核甘薤者。卽少亦必躬進之。南

川公與兄共饌之。念母氏之見背。則孝養其舅氏。見人皆勸之爲善。有兄弟相尤者數年。寤於公之言。友愛如初。鄉有鬪者。多就質於公。公直爲剖析。有一人出言不孫。衆怒欲毆之。公曰。止。彼未悟也。無何果自摧謝。公好藝蔬。蔬美行園。東鄰之子竊取之。見公委之去。公刈蔬分餉兩鄰。鄰有賣錫者。居廬屋之下。大雪夜半。公聞其頽也。亟往救活之。公以隱授自給。毛鷲無求於人。而時以分乏絕者。及孔時能學。每舉古忠孝節烈事告之。有傳丙戌三進士。劾房侍御寢休。讀之不已。至言及鄒爾瞻先生成進士。卽以論江陵杖戍。皆拱手曰。古人古人。余嘗觀古之隱士。大都皆剛者。生於溷濁之世。其視天下人多可惡。而無可求。故甘心貧賤。徒手而食。故衛鱣以織紉。陳仲子以灌園。嚴君平以賣卜。而魏公以授書。皆用之以全其精。剛孔時之怵怵諒直。有自來矣。魏公以孔時贈吏科都給事中。孔時稱述公隱微時事。皆俗士所不能道者。昔孔子贊逸民。皇甫氏祖之爲高士傳。皆自少至老。不嬰世網者。此寰區之棟礎。山渚之光輝也。續絕維世。乃貴於今。勒茲貞石。以播幽芳。其詞曰。

亙古斯人有首有趾。或徒或乘。或以致寇。或以賁趾。惟德之崇。靈越之秀。鍾爲若人。而辰不逢。慈覆早背。哀而合禮。爰自顓沖。歡厥考心。於厥兄弟。克友克恭。施及鄉鄰。恤其困苦。開其愚蒙。迷爾化之。塗親巷議。澗樸之風。夷銳隨俗。野服而奇。如蠋而龍。耄齡未臻。乘化長徂。神人攸恫。餘二十年。哲嗣乃翔。素節克繩。紹聞德言。爲國司直。凶族是膺。乃顯其親。穆行昭升。馬鬣加封。自霾民間。竟得其名。天豈夢夢。富貴而邪。

湮滅爲幸。叱隸非窮。凡百有位。念爾所生。惟孝惟忠。

明敕封禮部祠祭司主事義軒張公碑

張公諱一亨。字仲春。別號義軒。鄒平人也。齊魯英俊之域。然語近時人物。則咸推張中丞及公。中丞諱一元。公中丞之弟也。中丞忠清剛直。不阿權貴。憐人乘而圯之。其撫河南。有大功於土。而蚤拂衣。天下皆知其賢。公父諱佩弦。鄉黨稱孝子。以中丞貴。封吏部郎中。母孫太安人。公生而夙慧。與中丞同學。駸駸日上矣。而封公避繼母劉之難於渠邱。四載。中丞爲諸生。田荒室罄。公乃舍業業農。與僕賃雜作。竭四肢之敏。悉以其才智。用之生殖。家道漸溫。以奉兩大人。佐伯氏學。有餘。用之卹匱結客。張次公之名。隱隱起矣。及中丞登第。位日高。公日挹損。勞苦如向時。中丞嘗欲公入資爲官。公不肯。曰。弟以父兄之教。爲善人足矣。且孰不知其介弟者。何必假官爲。封公性嚴急。豪於酒。醉後易怒。多所譙譴。家人皆避匿。公獨以身當之。往往被扑責。或長跪至夜分乃罷。人皆爲公苦之。恆有愉色。其事兩大人甚有愛譽。衆稱張氏世孝云。中丞同氣之情甚篤。公尊奉之。靡所不至。中丞娶劉恭人。數舉子不育。公娶李安人。財有子。給諫君耳。見兄之噢咿也。請以爲兄嗣。中丞謂弟惟一子。奈何繼我。公曰。兄子之與弟等耳。且弟猶有待也。竟以給諫君爲中丞子。中丞自河南歸。杜門不通賓客。惟公朝夕游處。所爲樂其志萬方。一肴一核之美。必共嘗之。花開月明。必選勝地。釀芳羹。畢。景談笑。或自鼓琴。極歡而後罷。嘗爲兄御游靈岩。登日觀峯。望海而還。訪孟

中丞於東阿。孟公諱一脈。海內直臣。與張中丞同年齊名者也。中丞晚好養生家言。公於城北爲園。蔭以嘉樹。續以雜花。起歸臺。招延方士其上。盡禮禮之。傾資奉之。以是方士靡至。中丞殊喜。劉恭人之歿。先中丞十年。給諫君俱行三年之喪。公竟未再舉子。給諫君之補吏垣也。公正在京邸。戒之曰。汝慧。何憂不盡言。但須持大體。勿事搏擊市名。給諫君謹奉教。其爲諫官。惟保持善類。爲朝廷惜人才。戒偏黨。自中丞歿後。公忽忽不自得。城北之園。無復履綦。又五年亦歿。先是公見兄之無嗣。嗣給諫君。給諫君又無兄弟也。慮兄之不樂。惟恐傷之。嘗曰。吾事家大人如烈君。然有過。間一語自明。伯兄極友愛。顧絕不敢。公病時。給諫君聞之心動。於是伏闕上書。言臣本獨子。律不得繼。臣父以兄先。臣某無子。命之繼嗣。臣兩守制。幸報伯父母恩。成父之志。臣仍宜歸臣父。得旨改正。於是給諫君奉大行祚聖皇太后遺詔。下郡國。抵家。見公櫛沐如常時。然遭回不欲行。公曰。吾聞聖母詔釋楚諸王孫之繫在鳳陽者。此古今極冤。諸王孫久墜陰關。望白日。何得徐徐乎。給諫君不得已往別。後竟不起。初。公聞給諫君改正之疏。潸然失聲曰。孺子何爲者。將不令吾見兄地下乎。齊魯間聞之。皆曰。給諫君良苦。假令中丞在者。必不忍爲此疏。張次公亦必不聽也。公角犀豐盈。左眉毫長二寸許。望之知其偉人。中丞及給諫君貴後。頗斥田園。用陶朱之術。致累千金。意在濡困拔尾。曰。裸而能衣人乎。出責取息。不能償。則折其券。有一人而折至再者。貧民苦石田之逋稅。鬻之無所售。則以溷公。公倍讎之。曾不能償種。以是資用恆致不給。更假貸於人。尋復聚之。聚復施之。

給諫君爲令時。曾未寄一錢。其入覲不能無所費。皆減公之囊。公少時。弈碁。六博。握槊。投壺。蹴鞠之戲。皆一見而精。尤精於音樂。晚年惟好鳴琴。著琴經二卷。多所自得。觀書通大義。每誦歸去來辭。及赤壁二賦。喟曰。今安得有淵明子瞻其人者哉。公嘗因年饑。輸粟千石。當事者爲請於朝。得賜爵一級。及給諫君自上蔡令。爲祠祭司主事。受封如其官。里中皆以爲行德之報。及卒。無大小智愚皆慟悼之。公生於嘉靖二十五年二月二十八日。卒於萬曆四十二年五月十二日。享年六十有九。子一延登。卽給諫君。給諫君有五子。二孫。萬程。萬選。皆襃然諸生中。非獨工文。蓋彬彬有其質行焉。餘皆少而孝謹。余昔爲選部副郎。以妄言忤執政。時中丞爲考功。力明余之無罪。坐是貶官。及余林下被螫。給諫君又爲之露章暴白。余感知己之誼。莫能爲報也。給諫君以公之碑見屬。余曷敢讓焉。雖言之不文。然獨行如公。給諫君顯揚之。自可與天壤無極矣。其辭曰。

東爲春方。仁義之都。有君子國。在於海隅。矧惟齊魯。古聖賢區。吁嗟張公。至性迴殊。愛親忘勞。永慕弗渝。恭於中丞。喜戚與俱。血允可讓。甯身之孤。仁心所喻。緩急羣趨。賴及窮鳥。澤被朽株。孝哉給諫。中情孔痛。祇服德音。慎爲國圖。直而不倨。惟陽之扶。中丞休侍。給諫乃訐。功業方興。唯公之鞠。孝友忠貞。陰德宏敷。子孫詵詵。龍種鳳雛。昭垂來禩。天道不誣。

明高唐州吏目趙公繼室李節婦墓碑

吏目公名宸。僉憲趙君之祖也。君之父曰源匯。封朝邑公。朝邑公之母曰李節婦。李節婦非其所生母。其所生母王也。吏目公先娶李卒。復娶節婦。公爲太學生。年四十餘無子。每見里中兒習佔畢者。輒呼止之。使之業。旣去。猶顧曰。吾何日有此歸而言之節婦。節婦曰。妾固欲圖之。則遂娶王。甚相睦也。生朝邑公。及源深。吏目公謁選得高唐州之官。六月而卒。時朝邑公九歲。源深數月耳。節婦哭幾絕。久之少蘇。見王之慟哭不食。乃擊涕勸之曰。死者已矣。幸有二孤。孤存。是夫猶不死也。存孤者惟我二人。俱死無爲也。歸葬。吏目公如禮。明年王竟卒。節婦抱二孤泣曰。天乎。何毒趙氏甚耶。旣奪之父。而王又不憖遺耶。愛養二孤。備極勞苦。吏目公故貧。多所稱貸。索者日譁。釵或出惡聲。無所能償。黠者乃至雇乞嫗來。僥地叫罵。節婦無可奈何。則抱二孤號哭。嫗後知二孤非節婦出。則謝曰。賢人也。彼雇我耳。靡徙以去。而索者日急。乃以田廬償之。愈貧。會其弟病。攜源深往視之。源深戲傷額。數日不能下視。羣叔乃流言節婦將有他志。朝邑公聞之大懼。節婦歸。涕泣具道之。節婦曰。天乎。此何人哉。吾之不死何耶。自是遂不復之其弟家。朝邑公成童。則聞其邑李先生教徒嚴。命之學於李先生。而里中惡少。以其弱孤。大窘辱之。歸而悲憤不食。節婦曰。不食何益。爾第爲諸生。甯有是耶。朝邑公悟。奮學。遂爲諸生。朝邑公娶侯孺人。節婦有婦矣。家貧如故。值歲大饑。猝茹食糠粃。猶不能給。而猶分之王氏弟姪。竟以俱活。吏目公有義子。源深公歿後。頗失子道。夫婦俱早死。遺女三皆幼。節婦悉撫之。長爲擇配。每嫁輒泣。侯孺人知其意。勉爲具裝。則喜。或謂節婦不

怨其父耶。曰何與女曹兒。迨僉憲君生。賓昏咸賀之。節婦悲不自勝。侯儒人曰。有孫。何不喜而悲也。曰。吾悲若父有孫而不之見。又不自意吾今日乃亦有孫也。僉憲君少而沈敏。及爲諸生。有名。節婦甚喜。一日坐見吏目公自外至。起視之。無有也。曰。吾其不長乎。遂卒。不及見僉憲君翔也。節婦十四適吏目公。二十八而寡。卒時年五十有五。僉憲君成進士。自朝邑令入爲戶部主事。乃上疏具陳祖母李苦節保孤狀。曰。臣祖母李。辛苦墊隘。矢節靡他。以保臣父及叔。非臣祖母。臣父叔卽填溝壑。安得有臣及諸子孫。昔下宮之難。杵臼死節。程嬰存孤。二者之中。以存孤爲難。彼烈丈夫猶然而況婦人乎。臣祖母親行之。匪直再造臣家。實亦有裨風化。臣炳賴祖母之教。幸得離芻蕘。望見闕廷。謹白其瘼血荼苦之節。伏惟陛下詔有司旌揚之。以慰幽魂。少伸爲人後者烏鳥之情。臣炳自分庸鷲。不稱任使。卽捐糜莫能報萬一。惟與臣父母祝聖壽萬萬年無疆耳。疏奏。制下禮部。禮部以下御史核實。於是禮部臣謙奏言。御史臣夢得核李氏守節保孤事。具如主事臣炳所奏。甚明白矣。宜如例表其宅里。曰貞節。制曰。可是。時李節婦之義聞於天下。士大夫有文者。咸爲文讀述之。先是僉憲君六歲時。節婦銜下顧子若孫喜。因述平生難苦狀。泣數行下。僉憲君亦流涕。節婦謂曰。爾能顯我乎。僉憲君曰。能。節婦爲一笑。至是符矣。僉憲君屬余爲節婦墓碑。余嘗歷選劉向所傳列女。其最著者。人主爲尊其號。若高行義繼之倫。未有過節婦者也。貞節之褒稱哉。僉憲君賢者也。竟能顯其大母之節孝哉。趙氏之慶也。余小子敢不述焉。贊曰。

嗟世久衰。人迂節義。曰妨躬身。莫克享利。死豈見人。甯爲狗彘。有腆面目。污辱於世。母遭不造。堅貞達理。孤則趙孤。誰我誰爾。顧領可甘。外侮可被。厥形則活。厥心則死。活也以孤。死也以節。多神之佑。盧首而雪。昔之呱呱。昔之扶扶。日月其浸。童穉而夫。諸孫竹立。既足以娛。小者跳地。大者乃儒。爰從夫子。歸於黃墟。有孫階天。稱述母德。帝曰姁哉。樹風鄉國。孰知樁樞。名聞宸極。孰知夜臺。日照幽墨。彼已彊梁。彼已財虜。快意須臾。草木同腐。金石可敝。母名不朽。

明羅母何孺人墓碑

自合葬之禮起。婦人未有獨爲墓碑者。余友羅伯符來鄱上。爲其母何孺人請墓碑。蓋伯符之父葬新安。其母葬濟甯云。伯符之父曰應槐。真定開府應鶴之從兄也。曾爲合州二守。嫡母曰江孺人。江孺人之父圭守東郡時。劉賊攻破諸城池。東郡獨完。以功陞雲南太守。止一女。卽貴州開府東之之從姑。不輕許人。以合州公幼而才。許之。何孺人媵焉。何孺人事合州公與江孺人。撝詘柔從。夙夜勤劬。江孺人生四子。何孺人最後生伯符。此時羅氏貲多。江氏鼎盛。氣餒隆赫。又多男子。不以伯符爲軒輊。四子皆娶富人女。賄何孺人不爲意。而新安之俗。生子不儒卽賈。計日掇富貴。江孺人之子。皆賈於楚蜀閩越間。相示以贏。伯符讀書。不屑事章句。而好泛觀博覽古人之典籍。喜爲詩。求漢魏以來書人之真蹟。目玩而手習之。肆其餘力於繪事。又好古物。辨其世代真贋。百不失一。父兄皆笑之。持此將吸風飲露耳。何孺人母子囊清被

素時至困憊。有合州公之所不知者。合州公分產予諸子。伯符所得不及其什一。又皆敝陋。伯符欲爭之。何孺人曰。愛何必爭。不愛徒生釁耳。伯符遂不敢言。而悒悒不自聊。伯符娶鄭顯迪女。事何孺人甚孝。早卒。舉一子亦殤。伯符益憤悶。乃辭何孺人曰。兒家居終不能養母。兒將出游矣。遂游梁宋齊魯燕趙間。觀名山大川。鴻原曠野。與其大人游。或從伉俠博徒飲。以快心胸。發靈智。久之其詩與書日益高。繪日益精。士大夫爭欲得之。求交。伯符爲人坦率不欺。能飲酒。與之游處。愈久不厭。士大夫往往厚餽遺。壽何孺人。所藏古物好事者。每以重直購求之。伯符歸。以二百金拓合州公墓田。修其祠宇。又買田若干於膠州。置宅濟甯。奉孺人來居焉。諸公時時聘請伯符。所得四方僑味。歸而濯漑。擷古器。盛之以上。何孺人何孺人大喜。爲良食。伯符娶謝時城女。生之齊。謝卒。娶李春女。生之魏。大者能文。小者秀發。有識之士。以羅氏將興於濟上。何孺人年七十有八卒。彌留時。謂伯符曰。自我至爾家。處富厚之地。而受貧苦之實。不意爾能自立。孝養備至。濟上十數年。足償我五十餘年之苦矣。又不意有孫能讀書。於吾至足矣。孺人知分守柔約。而不懟華而不奢。以克有伯符。挺身行孝。宜勒貞珉。以昭懿淑。其辭曰。

羅始南昌。有得道者。新安是考。母氏是葬。乃乘白狼。昇天永壽。鄂州博雅。裔豐厥家。曰克販負。合州再儒。何起於微。伯符之母。克事貴倨。疏逃不怨。禮義自守。一室攸居。有藜有糗。有肉有酒。我獨顛顛。終不告人。閉心非口。有子弗抱。弗士弗賈。諸兄謹護。詞翰底成。王公沾之。金亦孔阜。板輿來濟。旣樂且康。至清以飽。

昔也無家。今也吉婦。二子峻茂。人能宏道。命雖不猶。福在其後。嶧山隱軫。施於西城。母是息老。南環大河。東望孔林。佳氣紛糾。千齡萬祀。南北之墳。二母爲主。

明封文林郎呂公墓表

呂公諱某。字德符。別號顯庭。少參君之父也。以少參君令崑山時奏最。封文林郎云。少參君爲令以循稱。入爲諫議。稱直出爲河南僉憲。及遼東少參。稱有其文武。君三弟皆弱冠。仲叔諸生高等。季里選入太學。皆高才能文章。器業早就。樞樞將將。甚盛也。於是柏人之呂最著。里中皆稱呂公善教子。呂之先不可考矣。公高祖謙。景泰中以選貢爲鄧州別駕。生惠。惠生太。太生朝用。公之父也。公魁梧頎頎。儀貌甚偉。少有異質。甫受經。目涉不忘。而仲父及兄。皆明經不偶。其祖謂公曰。止止。是吾家不當以博士起。故徒搢搢。抗敵精神。何益。安在其求之招搖之下。且富貴之塗多矣。何必博士。於是舍業明農。旣而睹少參君兄弟夙穎。爲延明師授經。督之甚力。竟皆成名。少參君令崑山時。公母張孺人尙健。扶之之崑山。蠶食華衣。必先以奉孺人。及少參君爲諫議。孺人老。不耐之長安。公亦戀戀膝下。弗往也。孺人沒。公號泣致毀。哀飾俱盡。兄若弟別居已久。少參君貴。輒以田不易者讓之。歲時數數饋問。姻族鄉黨。待以婚喪。及餬口者甚衆。病者以藥起之。至狂狴赤衣。咸悉委仰。其惻隱愛人如此。然見不平事。輒義形於色。抑強扶弱。不私親舊。故無敢藉以侮人者。少參君幼讀書時。外氏趙飲食存撫之甚備。厥後所以報之綦厚。猶若不足也者。公以

少參君貴。益自挹損。入卻奢綺。出無檐鈴。日與二三舊游。接杯談笑。供佛修祠。一初善事。欣然樂施。大都公性剛而心實慈厚。胸無隱情。事無留怒。人以是久而益稱之。以呂公終長者。公卒云云。

趙子曰。一國以一人興。維家亦然。呂氏自別駕公而後。微矣。呂公竟令其子以儒翔。非獨善教子。其人礪落倜儻人也。所謂高山大藪。乃能生之良材。呂公居家甚整。少參君既爲官。在公前。逶逶若緣兄弟。致美室無勃籛。雖萬石之行。何以加焉。此非偶而已也。其都榮享豐光慶前後。豈不偉哉。

明少傅兼太子太傅兵部尚書李公碑

李公名化龍。字于田。其先瀨鄉隴西人。七世祖瑾。徙長垣。瑾生公度。公度生鐸。鐸生蓁。蓁生盱。盱承誠。誠生繼古。繼古生棟。卽公父湖西公。贈兵部尚書者也。母吳太夫人。妊公時。夢大雨中有玉柱。自天而下。峙立中庭。生公。讀書五行俱下。爲文操觚立就。髫歲補諸生。稱聖童。郡守王陽谷先生。名士也。重公與南樂魏懋權。招之書院中。每試迭冠諸生。二公皆升高第。公舉甲戌進士。授嵩縣令。財二十耳。吏胥見其少而秀羸。署字故草草。試之。公心度宏廓。不問也。其輩遂駭媮。公乃攝以威嚴。豪猾皆聳。及朞而邑大治。世以方子奇東阿之績。公孤挺無援。稍遷南工部。權稅蕪湖。極清。無何爲南吏部。時魏懋忠。鄒爾瞻諸君子。皆在南都。結期聯騎。游於采石。雨花。燕子磯之間。稱詩裁賦。藻山川而賁草木。迄今傳之。以爲金陵之勝事。久之擢僉事。督學河南。較文甚速。其所指利病甚詳。且中苦學而久不遇者。往往驟拔之。其人率鼓舞。嚬

起一時稱神明。未見督學如此者。已遷參議。復督學山東。作人之效。猶中州也。公望日益隆。遂擢河南參政。尋入爲太僕通政。公以兩大人年高。素不欲之。邊塞而會遼東巡撫缺。遼東於諸邊稱廢壞。難其人。大司徒趙公世卿。山東人也。曰。李公督學時。兼攝數道。事至立剖。如簞之泛。輕塵。此何所不可。遂使公往。以邊功晉兵部右侍郎。蔭一子錦衣衛千戶世襲。旌賜金幣。升俸二級。公念兩大人數稱病求歸。久之得予告。解均服而彩衣以舞。甚歡也。而有播會楊應龍之事。先是守土者控馭無術。或冒沒重賂。會旣驕矣。而治以漢法。激之成跋扈。乃請剿。上就拜公總督川廣湖貴事。賜尙方劍。斬偏裨以下不用命者。比發家。則會已破綦江。參將房嘉寵。遊擊張良賢死之。而會之罪惡不可赦矣。公攜家以往。從容笑言。將吏恃以無恐。入綦江。卽爲文祭二將。曰。人誰無死。以法死。以賄死。以寒疾不汗五日死。以飲酒御婦人死。等死耳。何若死國之不朽也。慷慨激烈。足使人人有喪元之思。公疏請山陝閩浙各路勁兵。先後至。而舊帥劉綎坐遷延革任。公謂綎曰。將軍結髮從戎。膽智聞天下。而怯區區楊會乎。綎感泣願効死力。公保留綎殺賊自贖。命綎等八路進攻。而以文吏張棟。胡桂芳。高折枝。史朝貞等監之。破三彌。降其部落。賊大窘。而湖西公之計至。詔公墨縑從事。時賊鋌而走上海龍園自保。公密授方略。從國後掛路上。火其龍虎關。會投縊死。其妻妾子女皆就禽。凡斬首二萬二千六百八十七級。生禽一千二百二十四名。俘獲五千五百三十九名。播地悉平。又條上復郡縣等十二事。爲善後之計。皆報可。公疏求奔喪。八上而後得歸。服甫闋。起總督

河道。先是治河者遷去。或里居。皆以所築隄決追罰。至是乃起公。以人所不敢往。正如播州之役。公至則徧行淮徐鳳泗間。歷覽周咨。得前河臣所開泖河遺跡。噴然曰。是以避黃河呂梁之險。而措之枉席者也。奈何既脫而復入乎。乃上疏言開泖河便得愈旨。卽鳩工濬舊渠八十七里。新創八十二里。於是歲運千艘。通行無所礙。昔稱過洪。今稱過淮。卽爲已至。迄今賴之。公其時見秋水漲溢。不無衝嚙。方疏請爲分黃保泖。一勞永逸計。而奉吳太夫人之諱。以歸。禪除起兵部尙書。武弁之陞遷。大都諧價於天市。而取之於職方。公揭其資薦之數於部堂。有缺序轉。而倖濫稍息。考察軍政。諸特奧援多羽翼者。以爲萬不可動。而皆不免。雖久留中。然亦竟下。時論壯之。其所條議四十餘事。皆精審可行。公神氣素王。一旦病昏暈甚危。幸而甦。然遂衰。鬚髮顚白。殭蹠日漸。以至不起。公生於嘉靖甲寅三月十日。卒於萬曆辛亥十二月十五日。年五十八耳。以平播之功。及秩滿。加柱國少傅兼太子太保。卒後贈少師。曾祖祖父皆如其官。母皆贈一品夫人。所贈公元配及沈封皆如之。子不矜。錦衣衛指揮同知。不盈。錦衣衛指揮使。功名榮寵。可謂至隆極盛矣。而遠邇皆悼惜之。公才高天下。其爲詩文。隨手而成。卓然大雅。少年通顯。立致鼎足。而親賢下士。形骸都忘。終日談笑。情瀾靡竭。而未嘗有所漏言。所在思職。如田之有畔。尺寸不越也。遇事敢爲。而計慮甚周。必不出於萬有一危之塗。誠天受之全才。國家之楨幹也。今天下在外猶可展布。居中則多掣肘。蒼黃則急用人。閒暇則憑口語。且求去者亦甚不易。播州之變。天所以就公之功名。而見篤生之意也。

一爲本兵。卽難愜志。考選之事。纖人弗堪。過此以往。公且黃鵠舉矣。而大命頓傾。此天所以護公之功名。而成其始終也。嗟乎。天之於公。則厚矣。其如天下何。公文章功業。自足不朽。勒之於石。令後世以稽覽焉。其詞曰。

何神之英。生此俊人。能言斯斐。鳳羽龍鱗。僉曰才子。梁鄴之倫。試宰嵩下。白晳少年。歌雲賦月。擷秀芝田。金陵作吏。其曹亦仙。江南陸麗。綠水朱樓。自公多暇。聯翩出游。文酒逍遙。頌揚國休。視學河洛。及於齊魯。平之以衡。正之以矩。譽髦多士。青雲接武。公望日高。入爲列卿。遼人缺撫。出而救甯。乃若宿將。素習於兵。天驕狃怙。馬南向牧。騏然霆擊。狂奔痛哭。再舉復讎。控弦遠逐。直掃其穴。以莫敢敵。播酋小醜。無知犯順。舉朝蛩快。以公廷問。賜劔在匣。將士勃奮。滌地無種。夜郎爲郡。文武之聲。震動華夷。暫試行河。天吳畏之。帝曰咨卿。汝統六師。帷幄運籌。威險邊垂。如步大川。視公安危。而胡遘疾。遽遊太空。搖木生危。崢山忽崩。天人異轡。奇傑嬰凶。醫和前知。萑弘令終。千古同符。嘆恨無窮。

